

漳州府志

卷世二世二册内

三五公司所藏

ル 5
3438
32



門ル5
號3438
卷32

彰州府志

彰州府志卷之四十九

早稻田大學圖書館
藏書
32.4.16

漳州府志卷之四十九

紀遺中 乾隆志卷四十六



唐范攄雲溪友議載崔衮咸通間刺史有麻衣黎瓘者南

海狂士也遊于漳頻于席上喧酗鄉飲之日諸賓悉赴

客司獨不名瓘瓘作翻韻詩贈崔使君坐中皆大笑崔

使馳騎逐之其詩曰慣向溪邊折柳楊因循行客到州

漳無端偶觸王衙押不得今朝有飲鄉

衮名俱見開元寺成通塔中

唐刺史王諷作三平大師碑記引刺史故太子少師鄭薰

按薰本傳字子溥亡鄉里世系擢進士第歷考功郎中

漳州府志

卷之四十九

紀遺中

三十九

翰林學士出爲宣歙觀察使爲牙將所逐懿宗立召爲
太常少卿累擢吏部侍郎進左丞薰性孝友糾族百口
廩不克求外遷擬華州刺史輒留中後以太子少師致
仕旣老號所居爲隱巖蒔松於庭號七松處士據傳不
言薰刺漳州而諷記載唐文粹本爲實錄豈記載者有
所闕遺乎識以俟考

趙萬按趙氏宗譜萬高祖伯壽始居三山爲漳幕官因家
焉壽子師楷生希俊希俊子與佐與佐生萬景炎元年
盜圍漳州詔陳文龍爲閩廣宣撫使萬募義兵應之破
賊于楊筠嶺文龍以萬知龍巖縣事文天祥之駐兵汀

州也文龍授萬兵千人應援後兵潰聞天祥在循州欲
往投之至龍巖縣爲亂兵所殺族人負幼子文福而逃
元成宗間改姓王氏居漳城萬盈坊文福子君華由吏
秩授龍巖際留倉大使靖紅巾功陞龍巖尹

端宗景炎二年三月右丞相兼知樞密院事文天祥自漳
入潮次于漳浦先是端宗舟已自泉州港移潮州天祥
帥勤王師至汀州而元阿刺罕入汀州天祥犇漳州元
復遣降將吳俊說降天祥天祥責以大義縊殺之遂入
潮道經湯坑謁梁岳廟是夜夢神指示方向收集散卒
得萬餘人軍容稍振三月至潮時端宗已在惠州甲子

天祥遂復梅州

見宋野史

周公賢宣以延平守擢巡海觀察使促裝就道行至溫陵曾倭寇大舉漳泉道梗公乘舟繇海趣漳中途颶風大作舟幾危公神色不動須臾風止兼晝夜以濟至月港人尚未知觀察公來公爲憇一宿開誠撫諭民咸帖服送理彌實之後今爲帖姓按郡守姜公諒表忠碑跋云予讀王忠公文集見所著漳州路達魯花赤合魯溫侯墓表慨侯之忠義歲己亥予承乏守漳拜侯墓觀祠宇荒頽表石不存詢之元孫帖朝輔因審其姓之所由異朝輔曰侯生曾祖普顏帖木兒自入國朝摘其諱帖字

姓占籍生祖德台祖生父在月而孤家落失字隣涂思齊憫忠臣之後鞠之從涂姓名遜冠婚故家女遣充邑庠生怕恃同己子父不知其出自侯後以故坐地爲隣所侵表石隨以亡思齊濱寂命其子阜文阜質曰忠臣之後不可失嗣逮遜食祿當便復姓阜文卽世父賓興成均未官而卒阜質遵往命分父田業令朝輔兄弟復帖姓予旣新侯祠復欲勒忠文表石阜質子太學生雍原捐貲募工以成厥事噫斯固上天默佑忠義使侯不泯其傳抑又保佑善人使思齊有子有孫以繼先志皆可以爲世勸也成化癸卯嘉禾姜諒跋

正德二年金山大溪諸賊猖獗漳州衛指揮僉事覃桓領軍征捕擒賊首楊宗壽等三百名欽賞牲帛寶鈔十一年流賊詹師富等屯結盧溪河頭之大傘山委桓會勦擒獲賊首張顯福藍三等四十餘人又擒長高村賊首羅定亮餘俱奔象湖山拒守南靖縣請益兵請桓出哨會同廣兵夾攻未至猝與賊遇桓獨兵與戰射其巨魁賊佯走桓乘勝追逐賊叢戟刺之中喉而死事聞詔贈恤桓河陽人諱武書習弓馬素以忠勇自許

李太守筠溪名彌遜由侍郎來知漳州其季子熙復任龍溪尉監旗軍於福河因家焉故福河之李氏祖筠溪筠

溪有會孫竹湖名韶復為郡守亦以侍郎赴召漳人誦之曰方千里內一太守逾百年間兩侍郎舊志作二百年間者誤也

姜諒為漳守直指張穆按閩報命疏薦姜有盜化民安語大學士李東陽問曰化易言哉穆曰海濱有某某者家為盜姜撫諭之遂感化穆有所試之也

方策字載道廣西桂林進士嘉靖間知長泰精明廉幹卓有聲稱元夕張燈放煙火於儀門之外士民擁觀忽喧鬧踐踏死於譙樓下者一百有七人名譽大減陞漳州守以去遺所知書云雖伯仁由我而死諒會參必不

殺人創聞創見安保無虞公是公非久而自定蓋悔之誤也此亦可為當官豪華者之戒矣

中丞阮鶚帥兵討倭倭走南灣亂民從倭者集梅嶺且萬家參議往屠之水陸畢集中軍隔一舍宿是夜中丞蹕蹕不寐出行微月中所偕來指揮林鳳聞歎息聲知為軍門請所往中丞曰六兵四合梅嶺之賊可盡矣然孰非赤子其在浙直為倭還梅嶺則民也奈何畢殲之夜引數騎入詔安召教官覓梅嶺所善儒生二人軍騎抵梅嶺二生步從梅嶺先聞兵至戒侶約戰敗即入海從倭嗣聞軍門單騎至始不信有會役會城者偵之果然

乃延入其堡之大家眾畢集表及以聽堂上滿不盡聞

見累几為臺登而諭之眾環拜稽顙相呼泣縛倭遁藏

者數人以獻引眾至懸鍾所分別勸懲之收其驍勇數

千人分隸水陸梅嶺悉平

葉相國蒼霞集曰身從儒生數人抵梅嶺捕賊民之為賊

間者而收其良者為兵賊失鄉導乃大阻蓋指此也

劉公斯疎風格朗峻不畏強禦周中丞罹瑄禍緹騎入漳勢殊熏灼獨澄令不肯片刺加遺公嘗言吾在漳所心服者三人周綿貞即備遭慘酷終當以師事之外此則林鶴台盧雲際清恬異常林是時以太史假歸盧為逆黨所中歸而杜門公時時造焉

漳傍海地多瘠鹵仰給粵潮商粟以爲常嘉靖己未倭寇
海滄月港諸邊潮船不至巡海邵梗患之移文潮郡督
趣粟船乃通九船至必於水陸縮穀之處里有巨猾連
結富室賤價括糴俟船旣去乃遽騰其價雜沙土售人
潮船復相戒不入境梗廉得其尤者置之法商船聞風
復來

中璫高竊銜命蒞閩稅額漳澄之賈舶爲巨竊躬自巡歷
所過長吏望風披靡澄令龍國祿強項吏也嚴約所部
不得爲竊驅使竊威焰因之稍縮自後每歲一至旣建
委官署於港口又更設於圭嶼旣開稅府於邑中又更

建於三都要以嚴出入廣撈捕稍不如意并船貨沒之
得一異寶輒携去曰吾以上供三十年賈船還港竊下
令一人不許上岸必完餉畢始聽抵家有私歸者逮治
之諸商嗷嗷因鼓譟爲變聲言欲殺竊縛其叅隨至海
中沈之竊爲宵遁自是不敢復至澄

洋考

萬歷之末紅夷作難漳瀕海尤爲剝膚南二太中丞毅然
排款市之說焚所獻異物斬勾通奸弁親犯風濤歷海
上一炬舉之縛其夷酋羣醜奪魄相率引遁先是南公
提師至漳時賊驕從省供帳部曲奉約法民間秋毫無
擾軍旅倥偬猶事翰墨薄伐之烈敦誦之風兼而有之

南公旣去民築祠於甘露亭之山阿郡人周起元爲記
月港初就招撫百姓猶未帖帖出入持刀時出反語官莫
敢至其地溪丞金公璧聞命卽往以一二鈴下自隨羣
惡來迎輒與抗坐至以金二哥呼之舞刀其前目不少
眴書則編保甲清船號夜則在彼駐宿惡時矚其酣睡
嘖嘖嘆賞常自買米菜餽送一毫不受後署南靖甫半
月饒賊陷城被執不屈賊義而釋之當道初擬謫戍後
憐其居官清苦且無罪以年老贖去歸田錄詩云虎穴
蛇宮孰敢過持刀嫚侮有誰何三盃斝息如雷吼可怕
長髯金二哥又云清如水鑑無此滓勇似軍鋒不可當

此日思賢難再得空餘涕淚滿衣裳

余令應桂知海澄性廉明無停牘嘗有訟者判訖卽署云
甲與乙爭而鬪乙獨刃杖之其明敏多類此蒞任三載
不挈家無僕婢供朝夕日所餐者多用番薯曰適口耳
且可代置或啖不棄皮其廉介又不可及矣

曾一本之變中丞涂公澤以戊辰秋弭節漳南發水陸兵
擊之明年己巳五月公復至諸將各以舟師來會公禮
神誓師樓櫓相望帆幃蔽天金鉦齊鳴砲火俱發旣與
賊遇連戰皆捷生獲一本以獻

歸田錄

漳南群盜起梁良賴祿之徒盤踞深阻馳驟於龍巖漳平

未定平和之間姜鷹鍾亮葉祝方安之徒狐張豺搏南
被潮廣甲申三月張中丞鯤淵移鎮漳州以次討平之
於是都人作燕喜帖咸有歌頌以餞公於江東何尚書
楷詩云治世兼資別與攘兵刑共貫孰爲長埋輪昔喜
來荒橄賣劍今看淨遠莊莠草不除終害種桑條太漫
也須斨群鳥啞啞集臺栢似說竿頭進步強投戈息馬
問傳經江東有講堂時石齋方講學於此故云誰辨文星與將星魚鱉暫
茲間白旆換鷺端可是黃庭捷書竚俟圖麟閣凱奏先
喧渡虎亭試看桑麻加禮樂海濱鄒魯未凋零

周祖唐浙江上虞人順治丙戌隨佟將軍岱入閩以軍功

委授海澄教諭海寇破縣唐從容以天時人事反復開
道諭以

本朝定鼎政從寬大爾父深識時務業經歸命爾欲何爲
賊不聽逼令割辨易衣不從執入廈門脅之降不允厲
聲語賊曰爾背親逆令禍必及身將貽後悔賊怒遂殺
之義者塋之于廈門水仙宮側立碑大書海澄縣教諭
殉節周公墓

海澄公黃梧故僞鄭將也投誠守海澄鄭攻之圍急梧曰
鄭氏善穴地攻城今且爲隊乃下令沿城五步置一水
缸滿貯水每缸撥五人迭守注目缸中晝夜無輟明日

有報水動者掘之則為隊者已至其下入火藥燃之烟
出鄭營隊人皆燼

右宦蹟

陳懷忠字元甫

一作先甫

北溪先生父也吾閩蔡神與

元定父各發

黃德藻

幹父名瑀

皆以哲嗣益彰令聞而罕有知元甫者元

甫潛德惇行居家孝友治喪不用浮屠自其祖宥父歲
德傳至孫渠蓋五世同居云和祥之氣靈淑所鍾隱而
弗躍迺毓大儒前之江門後之浦江皆所未有也

李叔皓好學之士也為陳北溪所器及卒北溪悼以詩云
君資益清湛君氣亦温暇厭渠市利囂向我訪清灑卑

渠世學陋就我咨純雅肺腸無膠轄襟懷悉傾寫談義
信卽篤不以吾言野箴過聽益敬不以吾為訝授之關
洛編晝夜閱不捨竊喜得良朋可以結仁社同驅入德
車共策適善馬胡此會乖違使我聞陋寡嗟嗟今而後
詎見斯人者叔皓行事不見他書然味北溪此詩則叔
皓亦聖賢之徒歟

宋時有劉留臺者少極貧一日往泉州謁親故不遇復徒
步至漳州市水浴堂中拾金一袋浴畢托疾卧房中不
去翌早有一人號泣而來自言為商於外八年只收得
金八十五片以一袋盛之昨晚醉與同行携到此浴浴

江少府志 卷之四
罷乘月行三十里始覺金不見劉遂舉還之商以數片
為謝一無所受及還鄉人皆之答曰吾平生賦分只合
如此若掩他人物以為已有是欺心矣人皆嘆服其義
後一舉登第官至西京留守五十年間子孫在仕途者
二十三人

蕭元舉里宋名儒也其沒時陳比溪輓以二詩其一曰資
稟於人異天鍾自粹夷懷才無表襮制行絕瑕疵孝比
王祥篤和幾下惠遺鄉間稱厚德已矣但長噫其二曰
早擢儒科秀旋驅仕路榮平反東廣幕撫字桂陽城選
調方優脫朝階自坦行如何中道處遽爾輟于旌按北

溪集云輓蕭知縣而舊志蕭傳止云廣州教授與此詩
所謂撫字桂陽者異矣豈當時未赴任而卒耶故詩亦
有遽爾輟于旌之句

顏師魯公充遺留禮信使千金過界金人差禮部郎中王
巨太尉監丞蒲察甫接伴甫問云尚書台壽副使高震
云七十歲且等云煞清健聞知是名儒煞廉至東京賜
宴辭不可更辭撤樂以本朝有大喪臣子安敢聽樂若
聽樂尚何顏面以歸有死而已庶康等見公聲色俱厲
為之動容云尚書煞忠義連日懇免花宴館伴等申奏
并與特免使畢出城巨送伴行至涿州云前日幾得罪

公問何故巨云汴京申免樂宰執八人中三人以為是
 謂南使持遺留禮物如何教聽樂餘人以為非至邯鄲
 巨復云昨日劉尚書岸自言五年前往貴朝弔祭顏尚
 書館伴其人極賢者且言前日朝見仰觀皇帝布冠素
 袍號悲大哭及到殿前猶聞哭聲未已煞是孝誠出淳祐志
 宋少帝舟覆崖山陳恪殉難前一夕作崖山六咏詩云戰
 艦衝風起怒濤北船曉挫暮猶多強胡難蒲吞天欲志
 士橫羅伏海號一劍掛腰隨我去萬方引領奈君何其
 詞慷慨多類此兄陳植字玉潤封郡馬著玉潤宏詞十
 二篇微旨不能盡述又其姊陳碧娘作平元曲寄二弟

云虎頭將軍眼如電領兵夜渡龍舟堰良人腰懸大羽
 箭廣西略地崖西戰十年消息無鴻便一紙憑誰寄春
 怨日長花柳暗庭院斜倚粧樓倦針線心懷良人幾時
 見忽覩二郎來我面植兮再吸傾六確格也一彈落雙
 燕何不將我張郎西協義維舟同虎帳無衛平元報明
 主恨身不是奇男子倘妾當年未嫁夫請效明妃和西
 膚膚人不知肯我許我能管弦猶長舞二弟慨然舍我
 去日觀江頭淚如雨幾回聞雞幾濱死未審良人能再
 覩此詩慷慨當以慨有烈丈夫氣

漳浦縣佛潭橋楊氏據其譜序所載在宋德祐間元兵侵

迫宋畿祖楊亮節乃奉度宗淑妃楊氏及二子益王顯
 廣王昀如婺州元兵侵犯京都追將及亮節乃負二王
 徒步匿山中凡七日乃走温州航海至福安而即帝位
 遂尊淑妃為太后封益王為衛王亮節處置使冬十一
 月元兵又侵福安亮節隨帝再遷泉州港忽遇蒲壽庚
 作亂遷於潮州時亮節召兵在外未及從聞帝及皇太
 后崩進退不得乃隱於寶珠石之下居焉其譜序所載
 如此記之以備參考

趙若和按浦志若和封閩冲郡王元兵至隨少帝入粵值
 少帝溺海同黃侍臣許達甫等以十六舟奪港而出海

居漳浦積美鄉改姓黃氏傳孫明官文官明洪武十八
 年御史朱鑑閱譜牒奏請復姓恩錄明官為鴻臚寺序
 班文官為僭州宜倫縣主簿

元兵南下東山胡景清母被擄之燕為婢妾三十四年景
 清既長之燕得授稅司恩舉於傭隸間認得其母未數
 月其父繼至遂贖母以還去官不仕當時翰林集賢諸
 儒如趙子昂輩皆贈以文因得旌以歸劉宗道作論詆
 之謂某氏陷辱不死理無再合景清貪名陷父未足為
 孝然則朱壽昌之事非乎母雖陷辱子可弗認乎

傳稍異存
以備考

按此
與本

東巖居士者元儒林三溪廣發長兄也其名曰廣先邃經學尤長於詩書今文山有東巖先生墓然世但知三溪而不知有東巖矣東巖之子原佐本名靈輔志有傳列義行靈輔號松雲其弟昆有號竹雲者逸其名元季陳有定攻漳州兵至柳營江竹雲爲羅萬戶義民逆戰死之世亦竟無有傳者東巖之儒竹雲之義視其兄弟皆可稱二難紀載闕焉此太史公之所以發喟於青雲也黃曰新龍溪人幼嫻韜畧善騎射至正三年以武舉隸漳州路總管麾下平蠻功補裨將時海寇猖獗出沒島嶼曰新潛遣所部有胆勇者自投寇中爲寇羽翼密遣

飛艘數十如商舶狀寇來攻劫艘中預以油灌薪燃炬數百火寇船所遣部下亦放火焚其巢寇赴海溺死無算事聞賜爵萬戶開闢漳汀粵改督海運因討賊於海山陣亡賜諡武毅其孫昇甫襲爵副總管漳州路至正三十六年陳有定兵入漳州亦與羅良俱巷戰而死朱大理瑤在當時以詩名惜其集不傳有上左丞相李善長詩一首云聖君威武定天朝丞相勳名冠百僚漢室從王推鄧禹唐家開國任房喬江淮草木知名舊吳越山川闢地遙好把龍樓扶赤日應看麟閣近璇霄典藉莊雅亦燕許手筆也龍鳳中太祖爲吳王駐師金陵招

徠名賢以公車名應辟者四十三人太祖盡試其文高
啟第一瑤第二授啟翰林瑤大理評事

林元凱先生洪武初爲豐城令剔奸釐弊攘除甚力吏有
漁獵爲邪者度公將置之法遂誣公受賣菜傭黃金一
鎰緩傭死事逮下詔獄司寇以使安南却金事白上始
直其寃初被逮時舟次湖口夢一木人口眼皆動覺謂
所親曰吾其危矣及刑官入奏上見公名援筆草書休
問二字蓋休於字爲木人草書問字上下口眼皆動象
也尋擢判饒州府右王廉撰墓誌銘

王潮州源舊志作龍巖人福建續通志云龍溪人漳儒文

蒼亦作龍溪當是一祖藉一寓籍也明史循吏傳英宗
卽位擇廷臣十一人爲知府賜宴及赦乘傳行源得潮
州潮之西湖山上有石爲怪源命鑿之果得石骷髏怪
遂息乃琢爲碑大書潮州知府王源除怪石源在潮多
惠政民祠之陳白沙曰吏於潮多矣其有功德而民祀
者前韓退之後王啟澤啟澤源字也

陳一德少爲諸生真率骯髒嘉靖辛酉饒賊陷縣邑掠村
落一德與賊遇罵之曰汝滅絕天理吾將上訴於天殛
汝賊以刀擬之不爲屈極口肆罵賊刺撻其身幾無完
膚尚罵不絕聲遂磔裂之

林方伯同所蒞皆有惠政既致仕林下力爲善於鄉鄉人
愛重之白石林大叅魁壽以詩曰作成霖雨老藩臣聖
主恩深許乞身五嶺以南思保障九天之士繪麒麟搏
前莫勒歌千載林下於今見一人畫錦堂中龜鶴老幾
封忠孝課兒孫

劉惠喬鎮海人守正不阿爲諸生時忤衛帥欲詳疏之與
妻逃甫及鴻門而妻斃埋之遂竄潮陽雜於版築有鄉
紳偵其賢延爲師欲贅之而喬不知也偶潑墨汚其女
裳紳懷疑禮稍踈喬辭去紳陰爲之援例入廣闈中式
遂妻之歸修初室坐辛未成進士歷官戶部員外郎至

四川參政

有延布衣陳先生教子弟者適先生別赴飲同舍母視主
人之妻乘間詣堂逡巡至西軒妻置業履於床俄報先
生至忘携歸主人爲先生拂床業履在焉疑爲有私妻
無以辯曰願察之果爾死未晚也夜二鼓先生方對書
之妻與妻至軒外令妻作厚語叩門者三先生不問聲
益促先生曰夜闌何崇是辱名教也主人退而驚駭咨
嗟先生翌旦促裝歸主人率其族黨謝罪請留先生卒
不終日嗚呼疑似之跡非先生之至誠無二其妻能免
於死耶

陳成龍溪人原姓孫陳顯德養爲子後德生男奴畜之成
不爲異力負販供陳一日外僮陳賣其妻成還曰得衣
食奉親無妻可也陳病侍藥縗穢死復哭踊盡哀
詔安龜山葉龜峰豐讀書其上嘗有時夜雄雞爲狐狸攫
去恚甚戲爲文檄山靈次日狐狸自投可外斃龜峰數
奇隱茲山明正德中舒梓溪謫提舉市舶投刺謁焉舒
試以檀石山賦操筆立就大奇之乃薦於主司遂登第
爲先朝名臣其威靈正氣爲山靈所懾服如此
龍溪王魯菴昇爲大理寺正時獄事多所平反有錦衣衛
張千戶者繫獄欵上當死公察其寃力爲申救得免後

公過建溪舟觸湍石覆忽有舟倉惶來救及見卽前千
戶也蓋千戶偶有事於閩適遇之人以爲天道不泯
林偕春督學兩浙時會稽陶望齡因歲考不與補試之日
携斗酒入悠然獨酌若不以試事爲意者日將夕矣尚
沈醉未醒也堂吏以告偕春曰此異士也姑聽之望齡
酒醒磨墨數回洒然下筆偕春不待終篇取稿視之曰
吾固知異士取冠首名之上旣而魁南宮偕春見人文
字能知一生禍福嘗按試一州當簪掛時一二等諸生
畢集偕春謂曰若輩文章雖勝然福分不及于四五等
者多矣往例三等以下諸生得先歸肄業惟二等以上

侯學使者行道旁揖送歸之日值颶風大作沉舟死者無算

吳南州善爲兩廣總制初赴任時從以兩僕行李蕭然偵接者不知也既抵粵境會日暮投止旅店方解裝忽傳番禺縣尹至則騶從數十人厲聲逐客公殊不顧瞻尹大怒命擒之不得已乃挈僕他宿蒞任年餘尹適以墨敗赴勘公曰吾知汝有今日久矣不聞惠政而擅作威福一方塗炭可知尹哀詞白寃公曰我不言汝何能服尚記某店中逐客乎卽我是也尹悚懼汗浹背泥首求容公曰休矣吾不汝責因革職令歸尹出語同僚曰某

終賴吳公恩不然烏能歸者

漳浦黃嘉卿石齋先生父也家貧從外氏受學研精於性理與朱子綱目善擘窠大書嘉靖倭亂軍衛編民戶出兵嘉卿年方十八以大戶從督造戰艦猝值卒叛嘉卿拔劍斫兩卒衆莫敢動事稍平部帥欲獻其功從之謀嘉卿笑曰丈夫不斬樓蘭那支乃欲以殺兩叛奴自賣也不顧而去生平頗喜任俠有黃季布之譽晚乃焚所爲鈐韜書從事儒者顧家所藏篋中籍中久漶漫不可讀一日入郡買性理綱目諸書裝畢使人舁籃輦前行自執蓋隨其後安頓道旁必端拱侍立或怪問之答曰

此聖賢精神天下性命所繫安敢不敬乎其居家時時以此書教子故石齋卒成大儒云

龍溪陳昱字仲燦宋進士永祿七世孫由成化八年貢任仙居訓導時叅政吳森鄉友也知昱守官清貧發十金於學昱召僚友與共之郡倅謝珪於昱有舊昱未嘗一造其門其廉介如此又有馬喬者應宏治十二年貢任始興訓導勤於教誨諸生多所成就卒于官喬性孝母患目痛巾帕不敢近喬日以舌舐之母目愈

林鵬字紳士龍溪藩憲同五世孫也有雋才試輒冠軍妙齡食餼鼎革後去諸生不復應舉兄璵贛州兵備道以殉難死所構松壑書舍在文山之麓杜門隱居蕭然終老其清操介節可傳如此

陳範字伯疇甫弱冠輒謝去應制業而盛爲聲歌故自稱詩民工於臨池草隸殊勝其詩多致險語而好用難韻韓太守擢龍大令國祿甚重之蔣少宰孟育鄭觀察懷魁尤倍爲衿契晚好遠遊而入世殊拙與人語多誤然誤處偏解人頤年四十餘卒

筆記

林丹臺茂桂由進士官深州牧有文名爲孝廉時從山野讀書并驟涸公自解衣溲之編衣訖士羸衆驚嗔呼之公徐上曰林丹臺豈死於浚井者先是有王太常心泉

應顯亦以操聞嘗自提畚上屋拾瓦浦人爲之語曰太常捻瓦孝廉淘井兩條水身金寒水冷見黃石齋集林深州傳

龍溪鄭默菴深道宮傅歸老翠林著棲遲集今見鄭氏譜有留本府太守詩云可惜可惜何可惜可惜可惜清官留不得洪恩再賜三五年濱海蒼生深利澤又送本縣丁丙艱詩民望公來如母來愛民如母保嬰孩公今失母離民去民亦如公失母哀默菴不以詩名其古質可傳如此

吳朴詔安人初名電貌不揚而博洽羣書於天文分域黃

石陰符之秘無不條析縷解不脩邊幅人以狂目之督學欲爲死義陳教授立碑莫詳金陵之入爲何日電詳其事以此補邑庠生更名朴嘉靖中林希元征安南辟爲叅軍機宜多出其謀以數奇弗錄歸緣他事下郡獄龍飛紀畧乃成之獄中看又有皇明大事紀醫齒問難渡海風程九邊圖要東南海外諸夷及復大寧河套執畫今多散逸

海澄周公仲先爲應天巡撫適張紹和遊吳客其幕一日偶論次周文襄撫吳狀仲先日文襄以治行勝顧人品尚未十分紹和問其故仲先日文襄與王振往還紹和

笑曰使文襄不與王振往還安得撫吳十年乎仲先曰我則異於是其後仲先以忤璫得禍有謂紹和曰周公起家省元聯第甲科致身中丞當是地靈所鐘胡一旦缺陷乃爾紹和叱之曰吾漳二百年來金紫相望獨以身殉國者寥寥今乃得仲先忠臣孝子天地正氣此是鐘靈之最者子反以爲缺陷耶仲先立身紹和取友觀斯二事可以知古人之志尚矣

海澄周仲先開府吳門涂光祿南下囑曰路逢賤眷抵任寄言所須夏服應從武林製就携來纔一入署萬不宜向所部鬻物便當忍熱一年

石齋黃先生逸事方望溪集有云崇正某年余中丞集生與譚友夏結社金陵適石齋黃公來遊與訂交意頗洽黃公造次必於禮法諸公心嚮之而苦其拘也思試之妓顧氏國色也聰慧通書史撫節安歌見者莫不心醉一日大雨雪觴黃公於余氏園使顧佐酒公意色無忤諸公更勸酬劇飲大醉送公卧特室榻上枕衾茵各一使顧盡弛褻衣隨鍵戶諸公伺焉公驚起索衣不得因引衾自覆薦而命顧以茵卧茵厚且狹不可轉乃使就寢顧遂暈近公公徐曰無用爾側身內向息數十轉卽酣寢漏下四鼓覺轉面向外顧佯寐無覺而以體傍公

俄頃公酣寢如初詰旦顧出具言其狀且曰公等爲名士賦詩飲酒是樂而已矣爲聖爲佛成忠成孝終歸黃公及明亡公繫於金陵在獄日誦尚書周易數月貌加豐正命之前夕有老僕持鍼線向公而泣曰是我侍主之終事也公曰吾正而斃是爲考終汝何哀故人持酒肉與訣飲啖如平時酣寢達旦起盥漱更衣謂僕某曰曩某以卷索書吾旣許之言不可曠也和墨伸紙作小楷次行書幅甚長乃以大字竟之加印章始出就刑其卷藏金陵某家顧氏自接公時自對無何歸某官李自成破京師謂其夫能死我先就縊夫不能用語在縉紳

間一時以爲美談焉

張廷棟與弟廷榜結廬錦江之上自相師友一日有里生許暹至其舍見張兄弟對案不設盤餐惟蒲飲高談品第一時名士廷榜曰所見有兄耳廷棟曰無如弟也旣而曰此外何許人差強人意暹聞言乃掉臂闖入拍張肩曰好主司亦差不瞎三人大笑相與傾壘盡歡而罷後張兄弟進士許亦舉於鄉又有鄭輅思懷魁與弟瓚思錫爵亦兄弟齊名人號二思猶太倉王二美也陳翼飛有詩寄二思云翩翩書記遠從招醉上醺駒擁黑貂風雨春深寒驛路鶯花書暝過津橋雖然壯志能慷慨

未必他鄉不寂寥萬里還堪題數字憑君且暮寄洪喬
君家鄭季自深情何必驃騎第五名萬里寒江鴻雁影
一春客路鷓鴣聲酒人劍術驚燕市吾輩風流迫漢營
辨鼠歸來應不賤閑頭吏識棄繻生其兄弟齊名爲時
敬重如此攷輅思官部郎時疏減寶珠直聲甚偉所歷
守道皆有惠政居家奉母極歡撫諸弟皆成立而世所
艷傳者特其風流才藻耳

錦江張氏當日一門之盛不特廷棟廷榜以兄弟相軒冕
也廷榜子紹和以學行薦號曰徵君又其弟煙叔蚤擅
文藻列於儒林文苑豈有愧哉徵君有子凱甫名于壘

七歲能詩有明月小池平之句年十四紹和携之入閩
與徐興公諸賢卽席分韻童子倚待立成四座擱筆已
復侍紹和遍遊吳楚所至皆有詩名廬山看雲句溪中
一片雲分作千林雨惟聞溪流聲不見溪流處又陶元
亮歸故里詩云陶令憂世心醉以顯其節矧爲斗酒攢
腰豈斗米折不必窮桃源自與人境別三徑雖就荒落
英猶可擷清思密采似欲過乎其文惜年二十二歿矣
有幼清祠祀張童子凱甫也事見閩書詔安孝廉謝應
璋酌以詩曰石繡松篁錯一壇乍過酌酒草烟寒風前
弱柳青猶在天上高樓墨未乾白塵銀泓供夜酌紫雲

翠壁薦霜盤當樽大陸蒼茫甚轉爲千秋破淚看又紹和從子名于陞字進甫亦有文行惜不傳矣

龍溪黃孝翼以陞養母讀書被徵不仕退然儒生也及其爲義所激雖古俠烈無以過之當周中丞被逮時孝翼慷慨欲以國士誼履虎尾如康對山救李夢陽故事比至都爲詎事者所嫉禍幾并中孝翼孝翼益發憤作三阨賦哀之葉文忠公曰濟不濟命也當爲子成義烈傳魏中雪曰文苑中不可無節義一段光彩觀于孝翼益信

戴作材字利佐長泰人性聰慧八歲能文十四補弟子員

旋食餼讀書窮日夜不息下筆英挺率常屈其儕輩登前明某科賢書旣而絕意仕進偕功弟實華隱儒塘以詩酒自娛徜徉終老著有尚書詳參得得齋稿見武安風雅及林晉菴詩稿小序

魏呈習字永德龍溪諸生遊黃石齋道周之門道周歸隱鄴山築與善堂以居遠方來學者呈習督其役營度弗倦及黃公起補原官諸生皆歸故里呈習獨守講堂不肯去在三之誼特爲篤摯今與蔡春溶賴繼謹並配祀

鄴山祠

楊叶瑤字瓊夫明諸生性倜儻不羈嘗學詩於三山徐勳

章州府志

卷之四十九

紀遺中

三

二百八十八

燭稱其夙秉慧根若成誦在心借書于手者著有秋雨
堂集十二卷學者宗之其墓題曰嗚呼楊瓊夫之墓葉
先登立石表之

吳孝廉起元由同安學中式官慶遠知府崇正末闔家殉
難見紫泥吳氏家譜郡邑乘失之稽明史及粵志亦紀
載闕如死節事甚大而文獻無徵令人爲之懊恨林松
璵死贛州與楊廷麟萬元吉同時盡節史亦漏遺
林正字儀卿海澄人也舉孝廉而負遠韻談諺都雅嘗渡
海覆舟抱舵以濟壯年病困預知死期大集所親設宴
牀前徵歌奏樂爲劇歡頽然而逝生平慕張思光爲

竟亦庶幾近之筆記

張宇海澄人也海寇劉香犯境宇偕族弟明率鄉衆移炮
擊碎賊舟郡守施邦曜旌以匾曰功垂桑梓又施邦曜
薦諳熟水務偕冊封使往琉球授京營守備署叅將以
老乞歸宇從子子達以材勇擢千總康熙十三年耿逆
據全閩子達守月港城誓不從叛自揣微弁莫能支退
居陳州堡及克復海澄廉知其義擢授漳浦營守備卒
於官

明季遺佚之士有王鑾字伊人龍溪人賣詩自給一字一
錢王仍縉字伯雲漳浦人王道州會之曾孫也爲邑諸

生善大書著有吾廬章江於脩字中夫亦浦人不應試
行止岸異與人往來作書刺悉署霞城市隱黃仲英字
茂先倡韻社以賦詩爲陳元朋所賞丙戌後祝髮爲僧
名曰廡號不識施礎字潤石僧帽袈衣語善風刺丁長
春自號寄九塏字淡卿俱龍溪人李延熙字麗庵海澄
人逃於海陳重器字鎮况亦澄人善畫工詩爲邑諸生
或曰舉於鄉陳燹器字范况重器弟也與兄偕隱不入
市屢著有詭菴詩稿柯宰字季容龍溪人府學生娶黃
石齋妻妹以大婿從受業其爲詩善學石齋稱入室弟
子云陳有度字無涯弟允元字無技漳浦人亦從石齋

遊有度歲首生其弟邑學生鼎革後俱棄去胡元琚亦
浦人師石齋友丹山二張白號太湖山人晚寓龍溪之
白雲巖壽九十餘終

郡先正多夙慧科甲眉壽亦往往有之龍溪林弼六歲能
詩長泰盧岐嶷七歲能文龍溪謝璉年十八探花及第
漳浦朱天球四歲皆十八登進士龍溪唐文燦漳浦陳
一洙蔡一楠南靖吳宗熹海澄蘇氏俊並未弱冠舉于
鄉海澄倪大器九歲採芹十一歲食餽長泰黃文史戴
廷槐詔安葉疊弁髻齡入泮第一海澄林一奇七歲縣
試以萬歷聖帝君對七歲神童子爲令所奇龍溪蔡文

漳浦盧經並四歲善屬對海澄高克正八歲能文龍溪
呂旻高垠鄭懷魁並九歲能文懷魁年十三作海賦南
靖李貞龍溪蔣孟育並十歲能文龍溪張燮十歲通五
經兼覽史鑑百家子凱甫童年著書麟角篇平和李文
察十二歲曉樂律詔安吳村漳浦張士楷並髫年通星
緯學士楷未三十成談學錄龍溪林琪十歲能解性理
吳公布童年辨古篆其天植奇矯如此而享耆壽者林
梓年九十三林宰九十五張國經九十四張士良王應
顯九十餘若朱天球八十三趙渾胡廷憲陳國相薛士
彥張若仲陳天達俱八十餘指蓋不勝屈也

陳鏡山與林涓水小札云僕所善鄭貞子年七十九近有

葉道人

即葉心一

年八十六昨日並至園中是一異事頃林

蓮生見過僧淨初爲問訊而來蓮生年七十五淨初年
八十三何其多老人也抑僕既蕭然物外或清虛日永
所見皆康寧壽考歟因作一詩曰兩月盤旋四老翁壽
星專照在江東四人二百三十歲不知爲我與誰同明
日值足下生日僕將邀此四人同唱鶴南飛一曲勝似
畫老子出關也足下須準備待客客中謝兆先年六十
九周康山年七十二林莆公年六十七僕亦年五十六
主人年六十四皆鬚髮皓然各飲三萬六十觴是一幅

香山圖矣

江園小札

沈涯字濱泉詔安諸生性仁慈好施急人於飢寒窘迫際嘗除夕坐書館有歛扉請貸者涯橐中適羞澁遂脫已褲付質錢以去元旦不能出戶家人向詢始知其無褲也人號爲無褲公生平不與人競萬歷天崇三朝四旌

德行姪孫監生振垣亦品端行純力行善事有古人風藍理號義山少桀驁自大虎頭燕頤巨目豐頤力舉八百觔足追奔馬曳其尾倒行刀盾鎗砲靡不精絕癸亥歲鄭氏父子竊踞澎臺靖海將軍施琅名宿老將善用兵命往勦滅琅聞理英勇奏請隨師遂領先鋒屢以上功薦授至福建陸路提督見桑梓父老歛獻太息道微時顛沛事慨然有廣屋庇寒之意堪輿家言漳郡人文鬱塞者後山仙殿壓學宮地脉又東南千里港水門直瀉遂毀仙殿大興工役築千里港又以江東橋被賊斷後民殊病涉遂倡修江東繁費鉅萬借文武捐克以郡人之

罰錢繼之又狹小市廛恢其制度築浦頭石碼泉州新橋安海沙溪塗嶺行舖千百間大開街衢便民貿易可謂桑梓有功矣其他事蹟自有家傳此不備述也顏士行字大恥海澄三都人性恬淡不求仕進頌讀之外時以韻事自娛有釣臺句云好把長竿垂白水虛名富貴是浮雲可想其概矣子捷中膝下孝養年屆五十嘗學老萊子舞綵爲歡巡海道劉燦旌以匾曰追步班嬾孫志遠言行惇樸矢志好學乾隆庚辰科登賢書英年而卒人咸惜之

黃承孝字懷仁海澄三都人髫年失怙恃孝友人植伯兄客外國弟承廉及妹必以待哺又停柩未葬日夜寤寐柩側孤苦殊甚乃輟學務農積耕餘以葬親撫養弟妹畢婚嫁而隻身鰥居年四十三始就室方第稍長時出就外傳矢志方學以詩禮傳家兄久羈不返卒得函信遺二姪囑親友携歸朝夕教誨勉其成立族中有二寡母貧苦無依鳩而養之數十年鷺島提帥許良彬匾其廬曰孝友可風承孝雖業農嘗遇異人授葬法精于研究惟仁愛之心爲人相地不以禍福惑世漁利所決擇及鑒別多設驗奇中遐邇德之

余士前龍溪人也父賈西洋娶番婦生三子先是婦浴溪

中觸海氣雙胎一為鱷魚放諸海及父卒士前携三弟
歸鱷魚尾其後遇颶風失船萬里長沙士前兄弟與全
難十七人結槎海島恣行浪間槎左右傾鱷魚以背負
護隨其浮沉凡十八日逢巨艘爭緣以上士前獨墜水
乃施長繩使挽之既升鱷魚挺出水面望船低昂其首
良久乃去士前越重洋奔喪於絕島驚濤中出萬死一
生護三弱弟卒與俱濟孔懷真性卓卓可傳而鱷魚維
持保護亦物性之特異充足感人也

漳浦蔡少司馬長濤初宦江南署甘泉令抵任僅携二竹
箱蒼頭三四人甘泉人雄於財咸謂新令君可以貨處

也翌日紳士謁見卽遺衣服器用數十具皆不受有監
商妻壽日預羅諸賓客爲燕會榮顧獨不得邀令君密
賄縣吏以請令曰四十歲非壽也知不可屈是日會令
出乃囑吏役迂道過其門若賀狀而自遣家人迎仗叩
辭欲以飾觀瞻令覺卽於門前執吏笞之責以詭捏罪
觀者悉大笑其廉介如此廣陵人咸以爲美談云

漢書有云盜不過五女之門以女能貧家也故溺女有禁
所以教人厚其天常龍溪諸生王文明仁心爲質獨維
此風凡所生女皆長育之不忍自殘骨肉等禽獸之不
如至於遣嫁之日竹斂布裙惟教以敬順無違而已其

弟未有嗣息連生六女皆令長成楊觀察其去喪願其
廬特表異之後連生數子天之報施善人固不爽矣書
之可爲世勸

羅錫皇字遵之受業郭成郭之門粹然得其宗弱冠以郡
試冠軍入學受知汪棣園是時多士習辭藻爲詩酒會
遵之獨閉門脩宋儒書治經務敦實行少喪偶有寡婦
置私奩五百金欲嫁之因媒者以告遵之謝曰我貧儒
若母從我苦也媒以五百告何患於貧遵之峻却之生
平言規行矩廉受而惠施其教人寬而肅於後學多所
成就年八十餘尚籍諸生應歲科試學憲汪持齋大加

獎賞贈之匾曰耄而好學及沒有識者歎曰後生輩失
一典型矣

楊震威龍溪石碼人驍勇魁偉人號爲楊大力嘉靖間避
倭海澄倭衆由滄泉入寇震威與義士陳萃禦大徑嶺
俱戰死賊斷震威頭去尸立徑中三日不仆鄉族義之
鎔錫爲頭並陳萃墓大嶺之南因傳其墓爲錫頭公二
人執干戈以衛社稷洵赫然烈丈夫也

魏光翰龍溪人自號棲陽山人慷慨不治產業以詩自豪
遇得意輒撫掌大笑傍若無人所居僅亭數椽欹傾植
竹撐住亭前襍陳花卉木石供玩卽終日弗火晏如也

憲副陶公晴宇次西郊聞其名以禮延之入謁衣褐衣長揖就坐時以布衣狎兵使者衆訕讒起山人于于談笑無改容前後蒞漳者南海木灣梁公京口龍山周公咸禮重焉竟居約食貧終其身其詩多散軼汪有泉爲之傳

海澄葉棗瞻名湛生有足疾不良於行遂專業岐黃術有求者輿致之不拘禮贄常述先正云不爲良相則爲良醫志在活人而已天植純篤兄弟皆古稀食息不忍相離嘗對案舉杯論古今事慷慨激昂視若敵國不讓尺寸兄笑而頷之退而自訟曰吾過矣論事若此幾至藏怒宿怨乎乃負荆曳足膝行而進以待兄教兄亦不記前過彌篤友于其能自折照如此晚於青烏家言尤多領會家居濱海遭兵燹式微累世墳墓躬自修治又擇地建祠立局定向豫兆徵應後果如其言

程日烱字遜我漳浦人少喪父母以家貧多債負流徙外國雜傭作度日偶題聯句於叢祠外國富人見而異之延王家將贅以女日烱辭焉富人怒而逐之仍故業居數年拮据積累遂歸盡數以償舊債尚餘數十金爲從兄置室人或甚之日烱曰吾兄嘉禮過期宜速娶余可徐圖也無何同邑人聞日烱賢以女女之因發憤力學

登乾隆甲子科一上公車卒年僅三十餘初日焮葬父
兆甫窳見遺骸亟脫衣裹而封之移父柩葬他所其仁
厚如此

蔡覃漳浦進士如襄兄如襄為諸生授徒或不給覃輒資
之覃亦窮窘餬口臺灣歲丁卯大比積數金附商船歸
為弟科舉費旬有數日矣忽瞿然曰吾過矣吾過矣逕
返問其室曰弟就試乎妻曰未也覃笑曰吾固知若吝
而不給也因懷資趣如襄行而自荷擔以從是科果得
售又偕北上顧視如嬰孩如襄票弱覃必具酒肉強之
食而自茹菜蔬如襄讓終不肯下箸既畢試如襄以文

質宗人本樵本樵素不輕許可祇于佳處畧施點圈覃
取圈暗數之不及鄉墨梓者三之二持而泣如襄驚問
故始知覃以圈數多寡決售否同寓晒之而咸嘆其誠
慤如襄以辛未登第覃已卒人或問覃如襄輒殞涕不
休初覃之偕弟子京師也雷中丞鉉聞而願見曰世安
得有此兄乎覃問何官如襄曰八座矣覃咋舌不敢出
強之終不可如襄後謁選自請就學職得教授福寧性
渾厚淳實未幾卒於官

陳有為字秋亭龍溪人雍正丙午舉於鄉以教習授博羅
令復補清豐能舉其職性耽書畫兼精賞鑑於唐宋元

明諸名家解辨其欵識神韻鮮為贗本所炫故篋笥珍貯殆欲分寶晉之藏桓厨之秘而有之正所謂物聚於所好也其楷法工秀整暇亦名重一時云

善人君子不得而見得見有恒者斯可矣何有恒之難也蓋恒為常德達于所施則終始如一能慎始而永終亦善人之流亞歟海澄葉茂春少刻苦貿遷家漸豐饒不私一錢羣從受其推漑獨力興建祖祠置祀田整祭器修譜系皆先志未成而竭力行之也至于有無緩急克已流注無少吝嗇或勸以冠帶榮身曰吾聞事親者其次不辱其次能養今雖忝已不逮存但願不辱足矣他

何望哉市廛禮客以仁蘋當苦茗手口不相離茂春讀禮三年未嘗沾唇露齒其質行類如此生平不履絲衣縞以布素終其身時有鄉隣劉上舍恢諒者少孤能有立性行悖犖亦建祠置祀田四十石施於族黨秩然有恩尤加意孤寡當歲暮之交凡里中有艱度歲者皆酌周米各一二石錢四五緡又多焚積負券衆交德之此皆仁心為質合於敬宗收族之義能恒始終可為世勸云

周之欽字君得龍溪人幼失恃事繼母至孝父歿弟幼母患目疾醫弗效之欽以舌舐之目復明家貧力作撫其弟讀書成人將折箸憫弟不能治生盡以已田與之且為經理其家不使紛讀書志時人為之歌曰憂母目疾以舌舐之撫弟讀書讓田與之既孝且友誰其比之

陳春漳浦舊鎮人貧無立錫以製蠶杓為業兄死嫂嫁遺孤二柏方二歲墳僅週年春吐哺代乳擁抱禦寒有持

金詰聞者則淚泫泫下曰鸞姪得金狗璣不如也素識字輒暇吟哦市側旁若無人邑侯長公過而異之賜穀二石布一端以表其行同鄉太守張先躋稱其友弟進士江觀嘗言是人宜傳入邑乘春無子以墳為已子先春歿柏南在仍世其業

周樹字伯滋海澄三都歲貢生也品行端方問里重焉嘗集都人士為同善會每月朔望宜講

聖諭鄉有爭競藉以解紛一時鄉俗不變會中耆舊推領袖者葉桐友林乾若年皆古稀以上次則江弼士葉野臣黃懷仁林伯昭張夙珍江桃士湑子素王搏雲張渭西

周堯夫等共二十餘人悉敦行之士當道匾其里曰圭
海星聚

楊魁植字輝斗長泰諸生力學尚行壯歲遊鰲峰與童能
靈齊名院中時中丞奉安趙國麟躬爲講課器其學行
欲以孝友端方薦因父病不赴逮卒竟以身殉著有九
經圖及根黃集十卷

葉文博海澄諸生也父恒章亦諸生往臺灣十八重溪理
舊業卽次多年文博每懷寧父忽一夕得怪夢遂給田
渡而父已先數日卒文博哀痛不欲生護運父柩未發
而黃教倡匪劫掠村莊要重賞文博伏叢莽中不能得
或告賊曰文博性至孝若聲言焚其父柩必出賊從之
文博果挺身趨柩旁賊競擁臨以白刃索厚賂用七首
割其掌血淋淋漓堅不爲動探其囊無長物知爲文上
因甘言誘作主謀文博裂眦罵曰若等生

聖世弗安享太平而自作不靖當族滅吾讀書曉大義肯從
汝反耶賊怒欲殺之不果復以七首割其掌羈置別室
且挾以逃至跌死猴山上迫懸崖下臨深谷私計曰與
其從賊何若死於是得爲完人也時賊方睡遂望空投
澗有積草藉之得不死匍匐入孤村村人導以先路乃
反故居扶父柩於府切欲敵愾卽謁諸當路自備資斧

募鄉勇擒賊方被虜時賊之陰謀詭迹頗悉必伺察因
力陳可擒狀詞氣憤慨奔馳前驅不辭艱瘁後黃教授
首雖不闕其事然堵截偵探重有力焉時督帥吳必達
葉相德視之如心腹達之制府欲議叙適奉

命赴雲南事途寢遽滇歸而文博已卒矣

高光昭平和太學生好學慕義少失怙奉母至孝倡修祖
祠興文廟長子良琮典體父志置祀田百餘以充祭享
撫次弟良魁讀書領鄉薦猶賴其力三四弟早夭各爲
立嗣視猶子如已出

沈天銘詔安人有至性順治己亥烏山寇亂虜其父天銘

年十三徑入賊巢見父幽繫楚酷捨地悲號成并繫之
已憐其少釋使去號泣至家白母鬻粟田廬贖父以歸
竭股肱孝養人稱爲沈孝子父沒營宅兆於兆前得古
塚亟封完而他卜術者以地吉且離穴頗遠於事其可
天銘曰使其子孫在必云有傷得地而違天理吾不忍
也卒改阡後孫絢登戊子科賢書

連永昌龍溪人母黃氏孝事翁姑國初遭海氛流離轉徙
翁病家貧不能購藥黃氏默禱於天割股肉調粥以進
翁食之病尋愈後黃氏染病永昌年十餘歲亦叩天禱
祝割股以療其母將卒子婦環侍始道及之啟視刀瘢

未減卒年八十二

戴瑛字渭玉長泰諸生好讀書析箸時推家中物與伯兄
惟分先世數簾書而已自傷家貧無以為養嘆曰曾子
促襟見肱而養親必有酒肉竭力故也乃為邑明經王
來獻課子來獻欲於束脩外有所資辭不受講誦少閑
為憶母詩慘惻不可讀好宋五子書善解悟先儒黃道
周著易象正學者罕能通其旨瑛觀之輒了了嘗以其
書推已所降日辰年運生尅嘆曰歲在壬吾其逝乎已
而果然時年二十有九著有天文仰觀集字典考異及
愛陶詩集藏於家

林奕海澄人業師陳樹和老而無依奕終身善事之歿為
殯葬成禮奉粟主於私室歲時奠祭不衰在三之誼篤
至如此亦晚近所希也

黃世薰龍溪人孝事父母父病篤密額天割股為羹冀已
疾弗效哀毀幾殆繼以廬墓屢侵風雨病發至不省人
少愈諸弟以母命諭之方歸間一二日輒到墓哭泣沒
身乃止有欲訪之者求諸墓鮮不遇焉方薰之初割股
也孝廉黃鍾憲館其家紀以詩云割肉報親恩實是恩
罔極報之無盡期五夜作羹食薰惻然曰此非立名之
地後遂無歌咏者成其志也奉母甘旨罔缺母沒哀毀

而亡

沈嘉椿詔安諸生事母以孝聞或見母色不悅卽長跪俟
改容乃敢起待寡嫂盡推已產與之

國初海氛擾平民有陳氏女幼失恃年十七其父將女來
託嘉椿遠嫌疑不入室者累月時急脩邑城民疲工作
嘉椿弛衣帽用均苦勞又兵荒艱食多所沾潤以德行
稱於鄉當道旌其閭

陳紫奮平和人幼失恃事繼母馮氏孝敬交至詹事黃道
周之夫人蔡氏高其行誼出詹事遺硯贈之母晚年不
茹葷紫奮慮其淡泊易衰粥糜產購人澆和粥以進母年

九十餘身轉健有白鬚來巢

張福朝龍溪人本姓施幼避難失其家育於張氏撫之如
所生及張沒福朝服三年喪畢念及本生父母厚養我
而忘生我非孝也於是分繼其子圖四象而鄰失火已
至門抱圖悲號忽反風火滅

蔡次岳銅山人少失怙家貧樵採易米以養母撫幼弟三
人母病十年竭力奉養及沒廬于墓治家和而有法闔
門近千指合食無間言將卒先數日命婦女母近獨與
弟連床共語婉昵如少時其臨歿不亂如此

曾德第平和人同胞六人父歿諸弟幼德第手拮据以奉

母撫諸弟俱至成人兩弟早世弟婦孀居體恤備至母九十二卒一堂五世長幼七十餘人人有常業家無私藏德第沒後子若孫猶守遺訓不忍分析

張秦海澄港岸人少孤貧事母陳氏竭力孝養乾隆戊辰間歲飢謀往厦營生絜家扶母登舟至海門陳氏默念年老累秦不能遠離輒投海秦救不及隨赴焉次日母子二屍浮於鼓浪嶼水涯嶼之居民收而埋焉時秦年三十餘陳年近七旬在五月初九日也

許輝海澄東坊人割股和藥以療母病病遂愈順治七年邑令甘體垣旌以匾曰孝行天生程和西坊人割股和藥以愈母疾康熙年間郡守孫公陽旌以匾曰孝行可

風

吳聯登詔安人年十三父外出而母沈氏病思食肉聯登一時無措遂割股以奉邑令胡聞其事請於上憲贈匾曰奇孝可嘉時雍正十三年也

陳恩賜平和人九歲喪父依於母及長拮据經營撫幼弟至於成立而弟又歿恩賜上事寡母下恤孀婦竭盡心力年四十有司舉為族正整齊嚴肅四十餘載絕雀角之爭

林光天龍溪國學生少時父客死呂宋即奔往墓父既復

展墓與族人旅茲土者謀鳩金取息爲宗族計已而累
千遂携歸建祖祠置祀產與書田方其歸也泉郡某同
宿小蓬病死光天闕之佯病卧屍側閱三日臭出蓬外
舟人欲投諸淵光天泣告曰行有死人尚或墜之况同
舟乎衆感其義乃止越日舟抵厦島其人遂免葬魚腹
焉

陳雲平乃章徐岷川江未並爲諸生執文場牛耳黃唐堂
之按漳也試溪邑生雲平第一岷川第五古學則漳屬
雲平第一岷川第二越數載林雲將文翔以公車入都
於旅中晤江西會試者詢知爲漳州人具問貴府有陳

乃章徐江未乎曰同社也何以相識曰曩從居堂於文
闕中讀兩君試藝詩賦甚激賞至今津津齒頰兩君才
子也且訊近狀如何顧尚困鹽車乎語罷復爲嘆息
何文典字有型與兄文敘避海寇至赤嶺文典跳身古塔
之上值大軍進剿執文敘疑其爲謀也將刃之文典從
塔上投下泣請代兄帥義之俱釋歸

長泰戴公璣湯文正公斌同年也文正公潛庵集中有戴
公傳其贊曰公敷歷中外所至具有聲績年七十餘已
去官而父子先後殉寇難可不謂賢歟公先世中丞公
富嘉靖時治河撫軍名業爛然司馬公於萬歷間平岑

溪府江諸蠻功最著載在史冊班班可考他如太僕之
剛直方伯之清介皆有足多者而公父子以死事著勲
名節義豈獨甲於閩南哉文正大賢必非阿於所好而
戴公可以不朽矣

國初風雅之盛如葉太史先登劉吏部勃李叅議贊元蔡
推官而焯謝大尹亦騁陳學博箴並以縉紳爲駉壇主
盟至於庠序縫掖山林韋布互相競響亦不乏人龍溪
王之隣黃政稔楊殊李雲龍柳日生黃宗漢嚴乘方
垓羅耿辰黃嘉爵洪則孝袁田袁楚施澆漳浦江昂林
茂梓王仍鑿盧有章劉元鼎劉道章趙潛胡且梁鳳王

睿王獻蔡衍鏡藍綿琛海澄周山東居周名昌林惇李
向培何聖任陳峻鄭中玉陳圖南謝滋蘭周祖挺李雲
峰長泰王敬葉自本柯儼諸人南靖黃從馨詔安林
鶴雲平和董志遠張璵廖進並有詩稿行世亦採風者
之所不遺也

黨吾鼎陝西靖遠衛人以本府經廳于康熙十一年署漳
平篆十月殉耿逆之難

按此條應歸漳平縣志其子孫家郡城據呈載入
吳龍龍溪目兵戾戍臺灣值黃教倡匪龍擒賊黨一人而
賊繼至龍出禦被執奮臂呼擊賊愛其勇脅之降龍屬

聲自我

朝廷官兵豈肯降爾草寇乎賊戕殺之其子瀝陳龍忠義
日死忠死孝卽隸卒奴人盡屬山河正氣斯言諒哉

康熙初海氛未靖漳民多避出城有諸生林玉樹者携妹

遁跡於靖邑浮山山寨時白頭賊蔡寅等據西天山聞其
美欲劫之適玉樹他出衆議獻寨主余傑拔劍呼曰誰
言獻林秀才妹者人投我安不聞以危且死生命也忍
以紅粉媚狂魂乎衆議遂寢賊怒火之一寨俱燬又漳
浦高山寨主歐毅者其子爲賊所執以脅降不從賊鬻
解之尸諸石上終不爲動督寨人固守賊乃解去毅卒
無嗣人咸義而哀之

順治壬辰年海賊圍漳州數月斗米至六十金民相食人
肉價湧貴守兵每放若干人出城例留肥者殺而食之
孝廉謝鴻奇携家出城夫婦相商無可棄者惟一婢年

十四與一歲女孩可商去留耳謝曰婢無父母八歲依
吾至今日不忍棄寧棄吾女遂置女於地聲呱呱不絕
是時同謝出城爲兵殺食者甚衆獨謝一門無恙而遺
姊一人未至少頃抱女孩來云頃見女孫在地兵指曰
是呱呱者爲肉幾何汝持去姊急攜之出城骨肉十四
口相聚無缺謝後登戊戌進士見說鈴楊雪崖果報聞
見錄

方文耀字翟公崇禎庚辰進士授戶部主事典試雲南補
河間知府旋奉勅督餉遼東甲申之變道梗不得還又
傳聞思陵南遷乃間從海道抵金陵而福藩僭立與馬

阮不合歸閩中唐王召拜兵部郎丁內艱解職

王師之入閩也下漳州有帥府聞文耀名欲見之文耀不可

復厚爲贈遺文耀悉無所納亦不報謝遂遜迹入粵隱
於肇慶之莫羅山陳天定寄以詩曰離黍荒荒泪不乾
蕨薇人老未凋殘最憐佳句何從錄又領深心到處安
海闊但憑舟一葉天空漫叱劍雙丸歸來且築桃花塢
路接龍津拂釣竿又句云處世如今總汗顏君行度嶺
我依山堅持七尺綱常事萬里來歸鯉海灣慧山寄詩
引爲同志至於悲離黍慰蕨薇以堅持七尺相敦勉則
其意可知矣竟緇衣褒帽以終而子垣垓覩父高風遂

委身空門不求應舉著有遊楚吟蓋知忠孝之大義者
見永安縣志釋氏傳豈得以釋氏目之哉前志載揚履
園爲進士聯芳子以書賈禍君子憫其愚而哀其志未
苦垵之超然遠矣

海澄九都武舉林芳繼己未倭至奉王軍門牌委募兵已
得五十餘名復往石美地方再募值彼地戒嚴疑其爲
盜縛數人欲解官芳繼以軍門印信牌示之土惡奮言
曰今地方擾亂官府無法若繼之歸必反爲禍遂將芳
繼及餘衆俱縛殺之五十餘人同爲壘粉後各家訴其
事於官官曰當此亂離又干人衆欲歸惡於誰寢其事

不行謝憲副詩云豺虎縱橫勢莫支區區名募欲何爲
眼前猶敢殺吾衆海外安能制島夷又云賊殺吾兵常
慣見民殺吾兵豈可容五十餘人竟如此哀哉民命不

如蟲歸田錄

舊誌載中官陳相生與張敏保育孝宗事按明史紀妃生
子萬貴妃使監門張敏溺焉敏驚曰上未有子奈何棄
之藏之他室五六歲未敢剪胎髮時吳后廢居西內密
知其事往來哺養帝不知也成化十一年帝召張敏櫛
髮照鏡嘆曰老將至而無子敏伏地曰死罪萬歲已有
子也帝愕然問安在太監懷恩頓首曰敏言是皇子潛

養西內今已六歲矣匿不敢聞帝大喜即日幸西內遣
迎皇子妃抱皇子泣曰兒去吾不得生兒見黃袍有鬚
者即兒父也衣以小緋袍乘小輿擁至階下髮披地走
投帝懷帝置之膝撫視久之悲喜泣下曰我子也類我
使懷恩赴內閣具道其故羣臣入賀頒詔天下移妃永
壽宮數召見六月妃暴薨或曰萬貴妃毒之或曰自縊
也敏懼亦吞金死並不及祖生但敏同安人與祖生同
里同宦有事同謀理或然也

張光安字幼暉平和人援例入成均康熙丁酉科汪明府
薦擬第二人以策語不檢遂見遺居恒稱詩與蔡宮聞

藍玉琳陳少林許山仲極倡和之樂時浙江王復禮莫

堂來遊於漳亦雅相結約贈之詩曰不將束帛負春山

富貴榮華視等閒雅紹宗風高湖水陽明先生裔遙尋道脉

叩閭開小車遊慣人迎宿奇字問多客未還七十年來

身更健老懷長照六經間蓋人既迥拔庸流而風雨晦

明晤聚如此子升階食餼於庠試輒見知然終不過惜

哉

陳廷銓字百衡詔安銅山人少穎敏好吟咏年十九以縣

試第一入庠序江南陳竹樓爲軍幕且而器之授以音

韻法麻詩學日進乾隆辛丑秋應中丞王樓山恕召試

瞻臺賦拔入鼇峰書院著有鼇峰草日以吟咏自娛嘗
過鄴山單觀察德謨構石齋講堂落成詩以紀之極其
淋漓慷慨所謂鄴山懷古又哀然成佳不也奈數奇不遇
中年失配書劍飄零丙戌歲遊臺灣卒年已六十二矣
李時明龍溪人詹我士門人以布衣老方受業我士五經
樓時勵志攷苦凡詹師之一言一動無不稟承於其所
作大易通義洪範啟要易準羅經解履園遺書兼山餘
草蒹葭秋水堂諸集極爲珍惜護藏冀欲問世學使黃
之雋按臨時經呈請付梓未幾召還京師遂不果今時
明名載屠堂集昔人著述如太元法言等書若非桓譚

侯芭諸人安必名傳後世時明有其意而剞劂未就有
募刻詹兼山先生文集序付時明去者速其人宦歸而
時明故矣惜哉

卓澤之士幽隱不彰而積學厲行足以立懦固須表而出
之海澄布衣張至善受業周祖詔敦敦目守而論古慷
慨著有慎餘集扶陽錄仁壽錄皆處數百年論斷之案
從而窺之補其殘缺嘗質之教諭金星徽極擊節歎賞
以爲可傳也又手錄李弗損擇識編史論編示林子營
共抄之皆未授梓其討索申熟實一生精神之所寄他
年諸集或出而問世當知所自云

明季漳中舉位雲詩社於紫芝山麓有燕孟育王志遠林
茂桂高克正戴燦鄭懷魁徐鑾張燮陳翼飛黃信卿諸
人皆甲乙榜而陳範注有洵兩山人亦與焉在

國朝詩社有栩栩亭楊祺為長而陳箴楊喬岳劉魏阮旻錫
李基益王之鄰詹明章劉勃蘓崑隆亦在其中又有榜
壇同學如洪琮柯願羅耿辰鄭應甲吳楚楠凡若而人
又有趙霖主南州陳元麟主東江文砥宗伯蔡文勤聚
文章行誼之選都為一集最後黃士芳主龍山如文學
蔡長澧薦辟至兵部侍郎林斗魁亦同是舉刻有龍山
文淪時巡撫周學健延入署中梓向若二編後之臨漳

霞嶠亦繼起藉藉有聲矣

右人物

漳州府志卷之四十九終

漳女子以節烈傳者最多而閩秀絕少舊志載漳浦雲霄李氏其夫西上李勉之以詩有句云清朝富貴利名在結髮夫妻日月長又有與其姊夫李氏唱和汲水及書懷詩甚佳大李詩則無傳矣近世能詩者眾然罕有傳其最著者蔡玉卿為黃道周繼室博覽古籍然全稿多不傳人有張夫妹者平和進士張一棟孫女以學問為閩閩師嘗傳其書感詩云寒月穿林薄寒泉出澗悲

漳州府志卷之五十一

紀遺下

乾隆志卷四十六

漳女子以節烈傳者最多而閩秀絕少舊志載漳浦雲霄李氏其夫西上李勉之以詩有句云清朝富貴利名在結髮夫妻日月長又有與其姊夫李氏唱和汲水及書懷詩甚佳大李詩則無傳矣近世能詩者眾然罕有傳其最著者蔡玉卿為黃道周繼室博覽古籍然全稿多不傳人有張夫妹者平和進士張一棟孫女以學問為閩閩師嘗傳其書感詩云寒月穿林薄寒泉出澗悲

寒花無意緒還逐寒風吹又寒風動秋草愁人向誰道
重憶少年時所悲人易老又村居卽事詩有鳥語安清
晝蟬聲恁夕陽之句惜全集三百餘首今俱亡失又楊
氏漳浦進士蔡而皖妻幼聰慧善琴尤工於詩有曉起
詩云徑留殘夜月簾捲落花風又咏史詩云死士今朝
猶有塚生王今日已無頭恨全壁不存

漳之鎮海有汪一清者嘉靖辛酉廣寇張璉破鎮海汪
與諸生爲所獲已而賊擄一婦人至汪視之則同學友
人妻也因給賊此吾妹氏請無污之以待贖不則吾與
妹俱碎首于此若曹何利焉賊因置汪與婦人閉一室

中昏夕相對匝月始贖歸去吳少卿華曰俞司平瑞麓
爲余道以爲其鄉美談也聞然錄

明漳浦閩秀李氏雅善風韻有汲水詩云汲水佳人立曉
風青絲輾盡轆轤空銀瓶觸破殘粧影零亂桃花滿井
紅又書懷云門對雲霄碧玉流數聲漁笛一江秋衡陽
鴈斷楚天闊幾度潮來問故舟

陳氏貞淑故太常慧山先生族女也婦於蓮池林門蚤寡
陳氏能詩世傳其孀怨吟一作幾百餘言其略云自從
十七林門去中饋饔飧助所宜相業未終夫子志割羹

空怨婦情悲又云嗟此奄奄待逝人爲君朝暮爲君辛
只將白骨淋霜雪休把紅顏泣鬼神聞者哀而賢之先
是邑有楊生聯紫娶同安林次崖先生女楊蚤卒林亦
知書以節聞人謂不愧名家淑媛至是以陳比焉

周中丞起元有女許字於王少宰志道之季男未嫁而喪
偶中丞知女志亦不復別議婚比緹騎逮女痛父以直
隕身遂赴水死中丞死忠女死孝噫亦烈矣哉今旌忠
祠內有周小姐像是也

長泰戴鉞妻諸氏耀霜工詩著有冰心集六卷其五言如
寄弟云書廻燕市月人醉酒家樓別妹云相逢無一語

別後有千思發湖口云雲連江上樹露暗水邊扉其七

言如金陵道中對酒客談桃葉渡題詩人羨鳳皇臺如

春日遺懷穿林明月花三徑隔岸青山水一灣如早春

卽事侵檐夜月依霜白隔水寒梅點雪紅皆警句也

長泰戴達妻劉氏著有希行劉氏稿如咏花影非描非畫

非人繡采采輕盈月送來如咏蠟梅壽陽近日嫌脂粉

洗盡宮妝學道妝如咏虞美女花血濺烏江原上草花

開猶帶淚痕重鬢眉不能爲也

閨秀周氏夢玉平和進士天位孫女適海澄鄭白麓之孫

廷璋家溪邑丹洲能詩著有清寧里集乾隆甲戌沒於

水其子升如誦遺句有草短花殘蛩近榻風清露冷鵲
窺樓又咏秋原有風高盤馬地雪霽射鵬天之句明秀
可喜惜其集不傳

石鎮莊贊湯雍正時人有貞婦嘆一首為許子幼妻鄭氏
作也初鄭字于許夫嫁而夫販外洋浪遊二十餘載不
歸夫翁歿鄭奔舅喪行婦禮三年服闋仍返父家許子
幼有弟曰德正澄邑庠也年且三十不娶或詰之德正
曰吾嫂秉禮守義以待兄之婚而吾兄不歸也吾安敢
授室吾感吾嫂之賢而將以激吾兄之歸也故子幼歸
而娶鄭氏當是時鄭年四十矣鄭氏既以四十歲新婦

為里所奇迺越月而夫復往外洋居又二十餘載竟客

死鄭氏孤居食貧沒齒無怨鄭氏沒其夫弟德正之女
人莊贊湯作貞婦歎以唁之云其詩曰世重孀守較孀
難破嫌義盡三年禮守字春遲四表殘匝月仍甘分雁
隻清霜不怯繡鴛單嗟今沒後無旌典說到芳徽扼腕
歎

烈女吟府學生陳大樞為烈女李氏作也李氏烈不著於
世而大樞遺稿喜談節義其詩曰宇宙有綱維乾坤多
清淑不謂在女流偏能義烈肅曾聞李氏家許配王之
族王生志軒昂李氏情端穆可憐生未婚不幸齡偏促

而氏矢死堅明心呈嶽瀆逝者生同歸正月二十六盡
死以報夫芳徽長馥馥吁嗟乎世事浮沉成碌碌七尺
男兒要言結信多翻覆李氏一女子貞操知自蓄瘦柏
摧懸崖幽蘭萎空谷萎摧亦奚傷本性不可斲我雖草
茅無筆削願托國風寫芳躅儻得名登青史垂千秋汗
俗頽風藉洗沐

近世閨媛詩具有遠韻者上公黃夫人蕙氏又瑤著瑞圃
詩鈔初二集中多警句其五言如咏蓮云清芳君子品
超逸謫仙才來鴈云歸時人每後落處曲難終七言如
江樓遠眺云雲生遠岫籠千樹風入長江匯百川勗子

二云清泉未養童蒙德寒雪將侵慈母頭桐江懷古云帝
座有星原是客春江流水獨澄秋皆新警可誦至秋柳
步韻四章一憔悴不堪縈水畔婆娑獨自繞烟痕眉消
灞岸思張廠腰瘦章臺恨楚王難憑弱絮隨風起更鮮
柔枝帶鴈飛枚叔不逢空旖旎小蠻欲別尚纏綿則體
物之工用事無迹更欲與古人競細爭奇矣龍溪李薊
門細君周仲姬亦能詩著一如居集其警句如植竹示
子云虛心能被石轉眼已凌雲山村云歸鴉迷落日殘
杵動黃昏七言如讀周忠愍傳云後死七人無復恨先
生千載有餘悲雙節廟云爲厲欲殲生弔眼捐軀纔信

死齊眉寄妹閨玉云碧梧漏下和霜影猶是當年舊日
陰工整雋逸可咏也兩家全集俱跋板行世謹遵

欽定制義例生存者六雖作不錄故夫編入藝文中爲揭其
雅致如此俟揚芳者知所求焉

南靖李吼妻杜氏家貧善奉其姑嘗同夫登山採筍夫爲
虎所攫杜追及之拔虎尾而以柴刀斫其背虎舍之而
去負夫還家絕而復生論者謂杜委命虎口卒全其夫
勇以成仁矣

海澄高氏明太史克正之族也嘖嘖人言有孝婦云孝婦
婦于高事姑謹高之里常患虎一日婦方抱幼兒侍姑
立虎忽闖其室婦置兒地上急負姑而出久之以爲兒
死於虎也哭而呼鄉人鄉人聚而開虎虎驚遁去兒竟
無恙衆曰孝感也孝婦康熙時人逸其姓

鍾紹英妻潘氏海澄人英病篤潘侍湯藥不懈夢神語曰
而夫當死藥無靈也潘持齋拜斗願以身代遂不食九
日卒夫病果愈邑令黃會旌其廬曰折壽寧夫後令馬
聯臻贈以聯句云願分歲月綿夫算擬得河山贈婦名
洵大義昭彰能人所難矣

張文煥海澄人繼室阮氏生二子煥卒阮矢志孀守前子
維域娶郭氏舉二子域洋販客死郭盡鬻粧奩奉姑撫

子茶苦備嘗姑媳皆外國所生女而守義如此卒以賈其報可歎也

黃氏龍溪人陳荆山母性至孝奉事老姑甚謹兄侍衛京師家有老母邁疾氏奉姑命省視見其病劇遍求醫藥弗效夜夢道士語曰惟親生血肉可醫氏稟命老姑割左股和粥以進病遂痊一時咸稱孝女年四十七終右列女

唐介字子方江陵人父珙官漳州介隨侍焉父卒于官州人知其貧合錢以贖介年尚幼謝不取後累官至叅知政事

趙鼎解州人宋高宗時爲相罷知紹興府秦檜惡其迫已徙知泉州歸復上書言時政檜忌其復用諷中丞王次翁論之謫興化軍移居漳州

岳玘飛之孫也初飛被誣二子霖震謫嶺南後量移于漳因家焉孝宗嗣位始錄其子孫霖官至朝議大夫兵部侍郎子珂官尚書右江州震官朝奉大夫戶部郎中出爲江東常平使玘戶部震之子以祖澤補官任連城尉卒

連南夫應山人累官經畧安撫使知廣州時金人歸河南地南夫表賀有虞舜十二州昔皆吾有商於六百里當

念爾欺爲秦檜所惡謫泉州尋隱于龍溪尚書峰之麓後因名其墓地曰連山南夫五世孫琇璇字康居據家譜所載與文信國天祥召募勤王拒元兵于五坡嶺一族戰死三十八人而史不傳忠義英靈幾于磨滅可勝浩歎按尚書峯之麓有連南夫墓碑鐫寶謨閣學士謨字恐誤文獻通考載奏議二本寶文學士連南夫著考寶文閣自治平間已置而寶謨閣至嘉泰間乃有此號南夫之卒在紹興年似當以寶文爲正也

劉子羽建州人紹興八年御史常同論子羽上批出白州安置趙鼎曰上謂草疏中論及結吳玠事今方倚玠恐不自安同疏再上以散官安置漳州

向士璧字君玉常州人景定中以權兵部侍郎制置湖南會元將兀良哈攻圍潭州士璧極力守禦聞後隊至遣將却敵有功潭州圍遂解事聞拜兵侍兼轉運使賈似道以其不閑白宣撫司諷臺官招撫其罪劾罷之送漳州居住

黃幹字直卿御史瑀之子也居福州三山年二十五從朱文公學公常語人曰直卿志堅思苦與之處甚有益後遂以其子妻之文公守漳幹從行與郡人陳淳講道于芝山之麓及編禮書獨以喪祭二篇屬幹稿成文公喜

日他日當取家朝禮悉倣此更定病革以深衣及所著書手書與訣曰吾道之托在此吾無憾矣歷官知漢陽

軍安慶府皆有善政卒諡文肅學者稱為勉齋先生元

泰定間漳州府立文公祠以幹配享明正德六年提學

楊子器知府陳洪謨立勉齋祠于登高山麓之左其十

一世孫長史析居于漳至孫瀚始衣巾奉祀十四世孫

甲午鄉薦新甲仍奉祀

文天祥吉水人年二十舉進士第一時元兵起詔天下勤

王天祥自贛州集義師策應屢應益勵因收兵汀州分

遣叅贊吳俊輩取雩都諸縣景炎二年正月趙時賞等

敗回元兵犯汀閩守臣遁天祥移漳屯龍巖之湖村練

義勇圖入衛時賞孟滌等皆提兵來會而俊獨叛降元

還說天祥天祥縛俊縊殺之四月乃由漳入梅將趨贛

撫其年宋亡為元兵所執後五年死于燕市明嘉靖已

丑僉事謝汝儀以天祥嘗駐師于此乃即燕養正書院

改建祠宇塑像其中取新墾田租三十七石以供祭事

龍巖亦有持祠

嘉靖初吏部尚書陸完坐通逆藩謫戍鎮海衛四年七月

二日卒于漳開元寺之碧玉堂陸自知死日言于郡人

至期觀者駢闐初無疾苦俄端坐而逝有登太武山歌

大書刻石筆墨甚偉白石林魁有弔陸水村詩深山聞
計淚空流中立終非爲國謀獨有狼山風捲海可憑壽
火照千秋又云謂公負國則不可謂公忠國又難言千
秋太武山頭月惟有登臨一愴然

豐熙浙江鄞縣人宏治乙未進士及第第二人授翰林院
編脩歷講讀學士嘉靖初以議禮忤旨謫戍鎮海衛足
跡不履公門日以講學爲事或感慨時事往往發于吟
咏尤多著述其學以程朱爲宗與龍溪處士蔡烈遊寓
居雲洞充然自得嘗因烈等請建文信公祠自爲文記
之又以陳真晟周瑛二先生生長鎮海倡明道學率本

衛諸生呈于督學及兵使者爲建鄉賢祠後卒于戍衛
人以熙有功於鎮舉呈配享陳周二公至今思之

邵經邦字仲德浙江仁和人正德辛未進士授刑部主事
歷員外郎嘉靖八年因日食建言謫戍鎮海自到戍苦
心向道竭力啓蒙所著有三宏集曰宏道宏藝宏簡而
宏道錄尤深于理其說以率性之道渾然在中隨感而
應莫不會通于五倫之間其分親義序別信者各舉所
重而言耳非謂父子止限于仁君臣止限于義而已故
總揭五常之要於其首而分屬五倫於其中歷引經史
所載及本朝故事以發明之爲卷五十有七與宏簡等

書俱於四十四年監察御史胡公提督道蔡公刊行于

世

隆慶間子康生奏復原職

陳九川字惟濬江西撫川人正德甲戌進士歷官郎中因諫武廟南遊廷杖謫戍鎮海九川嘗從王陽明先生講致良知之學為高弟陽明稱其進德有一日千里之勢及與鄒東郭諸公往還問難詳見明水集嘗講人心本自完全但能決去壅遏則本體自然流行東郭亦稱其學問日新日富在戍不久歸卒于家

李材字孟誠江西豐城人以巡撫中丞坐事謫戍鎮海其學自闢門戶揭脩身為本以統括聖經其言廣大浩溥開示若懸河聞者于言下多所悟入至漳自都邑大夫下逮子衿咸執弟子禮焉于巡撫敬菴許公督學匡岳徐公稱師友改脩道原堂為講學書院所傳語錄甚多無非反覆開明脩身為本也凡名山磨厓勝地梵宇必勒書四大字以詔來學其辭受取與一以道義自信居數載歸卒于家號別見羅今海內論學者率以見羅先生為宗

陳第字季立連江人幼為諸生博學敦行尤負經濟精孫吳兵法俞大猷嘗謂之曰以子之才當於古名將中求之戚繼光討倭辟第為幄幄倭平薦授守備陞遊擊以

江少府志 卷之五十一
仇直忤長官遂棄官歸著述自娛吳一沛倡芝山講會
聞第名延爲山長漳士與講者常二百人析疑闡奧悉
愜士心又嘗主一沛家爲作一齋說所著書有伏羲圖
贊尚書義毛詩古音攷行於世

太學生富春葉李率同舍生八十三人伏闕上書攻賈似
道景定五年黜配漳州後似道南謫會李赦歸遇於洛
陽橋李贈以詞曰余歸路公來路天理昭昭胡不悟公
田闕會竟何如仔細思量真自誤雷州戶崖州戶人生
會有相逢處客中邂逅少蒸羊聊贈一篇長短句李字
太白宋亡隱于富春山元世祖徵爲平章政事見通志

叢談并元史本傳

曹學佺字能始侯官人弱冠舉進士授南京大理寺正天
啟中陞廣西叅議所著野史紀畧觸璫怒幾得重禍削
籍歸崇正初起原官不赴居石倉園中爲十二代詩選
盛行于世元進士曹用居於海澄樹德里訪其邦族因
聞張爨爲漳著述家遂造訪辨證張招入霞中社有詩
云談詩開勝社結宇出塵寰霞紫城中氣煙青海上山
一時人競爽千古道俱還不是同聲者豈能到此間詩
見石倉全集華亭隱士陳繼儒常言閩中著書三家侯
官曹學佺晉江何喬遠龍溪張爨也學佺有友徐爨亦

嘗遊漳與燠往來博聞多識善草隸書積書數萬卷以布衣終

王慎中字道思晉江人年十八舉進士授戶部主事忤時宰張孚敬謫判常州累遷至河南叅政又以忤夏言落職歸益肆力古文詞高雅淵博卓然成家當是時天下之言文者必曰王唐唐謂荆川順之也然順之每自以爲不及中丞蔡文評慎中文斟酌昌黎南豐之間可繼唐宋大家後慎中聞言頗躓之慎中故與文友善嘗造其家爲浹旬遊陟雲洞訪鶴峯蔡烈論學又爲文父梅園誌墓見遵巖集中

徐孚遠華亭人雲間六子之一明亡入海嘗遊郡中士人經其題拂皆勝流俗而有實學者後復入海不知所終陶自悅字心兌江表名進士文山鄭剡夫汝楫延主其家塾嘗課諸生云不讀書則口生不作文則心生不寫字則手生三生誤一生漳人誦之以爲名言汝楫龍溪人後舉于鄉其家有陶詩稿一卷皆主塾時作云

蔣光昌字載錫廣西全州人與兄兆昌先後登賢書康熙末年兄令尤溪有政聲雍正二年調海澄未幾兆昌卒于官連遭三喪宦橐蕭然旅櫬難返光昌於是應聘義學操行狷潔積學淹通教人以讀書窮理立心制行爲

先文藝末也時有觀風整俗使劉思恕屬光昌舉主知其落拓困窮示之意光昌一謁之外不再至曰吾受知未報敢或有他請乎終年朝悲暮益一塵不染功餘吟詩弄翰皆詣峻絕暇日攜諸弟子步雉堞徘徊望遠洒然自得遭際坎壈直忘之矣雍正九年門人鍾儔等劇金當麥舟之贈乃扶諸櫬還臨別題齋壁曰環堵蕭然一畝宮數年會此駐颿逢古來流寓知何限人在黃州說魏公玩其詩句已早自位置矣

童能靈汀州連城人學問醇篤退然若不勝衣而胸羅經籍四庫畢備學使吳華孫舉學行欲貢成均汀漳龍道

額爾古善舉禮厚幣聘為郡中講席著有朱子為學考

及周易刺義樂律等書學者翕然宗之未久卒於漳巡道令其門人具白衣冠護襯以還優禮備至後汀人舉入鄉賢實俎豆馨香焉方在漳時嘗過赤嶺見陳忠毅公祠及姚邵院祠有句云孫燧死忠無愧節文成定難有奇動蓋以孫比陳以王比姚也經學名世而慷慨論列又如此

雷鉉字貫一號翠亭樹軌在朝端海內所共見聞也方弱冠時漳浦蔡文勤世遠掌教鼇峯躬親受業故嘗至西湖會文講學敦切雅誼厥後侍書

東宮傅官憲長及提學浙江

御賜詩有云爲汝便因養老母卽斯推可教都人可謂優體之至矣逮奉母歸養至於終事亦遂卒學者望之如泰山北斗云

右寓賢

宋康庶字達先龍溪人家貧博覽經史通邵氏數學善觀天文占休咎郡守欲以學職延之不受生平一介不妄取隱居名第山一日自題於壁云某日太守至及期傅伯壽果至果實有至者皆預知其數嘗謂人曰某日朝廷有變旣而光宗遺詔至又曰庚午詔鄉里不薦士某

年塲屋不靖所言無不驗

明詹永遠南靖人自幼失明宣德間寓居龍溪以人生年月日時推其貴賤壽夭及父母兄弟存亡行次多奇中者亦善占法尤精射覆又自知死期先詣所知辭謝至期果卒

林存祥龍溪人善醫用藥不拘方類推詳性味而變通之經其治者多愈有縣丞卓某疾存祥診之曰明年五月五日午時卒已而果驗其星命亦多奇中

許神醫失其名詔安人善針灸嘗之潮潮有婦孕而胎不出婦幾斃衆醫羅列許往視之一鍼而兒墜衆醫爭酬

不能決許曰兒兩手托乳根上故不下以鍼刺之痛則胎動其掌中當有血痕視之果然

戴皞字弘亮長泰人與同邑薛九公名惠祖蔡萬益名鴻基同往虔州學青鳥術於廖景庵盡得其秘嘗自擇葬地于徐塘坂預營規制封土如星落立三壙穴道以待有水涓涓從壙中流出雖虔之善堪輿者不能解也薛蔡亦各擇良穴其子孫遂俱爲泰邑望族戴尤顯貴

楊五璇漳浦人指思工巧善雕鏤玉石水晶諸類凡人物鳥獸蟲豸器皿俱極精肖當事諸縉紳爭延致之又能以徑寸琥珀作玲瓏準提像手眼毫髮畢露見者驚奇

絕韋周亮工閩小紀

楊棋字吉生漳州衛勳裔也少補弟子員內成後棄所業結茅於北山之語雲峯肆情于書法及畫寸紙尺幅人爭貴之年九十六卒

周佛曰海澄人少攻舉子業性最孝一日歎曰人子事親何事不可自致惟父母病最難遇一庸醫誤人奈何遂遍考方書卒通其技嘗著論曰元氣本根也軀體枝葉也本根不固則本衰元氣不充則身危僂弱而延壽者元氣存也強壯而夭折者元氣亡也故峻削之劑不可用而旦夕之效不可期用峻削者雖快小鬱而貽大憂

期旦夕者或利一時而留後害故善醫者務以和平而致理善用醫者勿以遲效而心疑友人見之曰佛日良醫也通其言可以醫國矣

李道合精於醫海道邵榷子有疾李曰陽虛也用升陽湯補之數服而愈明年偶患他疾或謂升補太過授以滋陰疾加甚李更進前劑竟瘳子敬忠孫懋勲世其業

林虛極善彈琴十歲出家爲道士十五籍名天慶觀年三十雲遊名山歷五十州軍宣和間至京師時興七科試中琴科引御奏琴稱賞九八宣召賜賚有加差知神霄玉清萬壽觀號金壇郎佩金紫乞歸漳許之藥珠殿侍

晨徐知常送之以詩

鄭萬精醫術治病以意爲之不主故方而時得奇效嘗治太守某公夫人兒啼腹中傾圍棋子一奩於地命兩婢夾夫人俯拾之未半而啼止蓋兒在腹中口失乳根而啼母俯身以乳根就兒得乳則不啼也旣而太守得其壽君秋捷信喜甚頤張不可合召萬萬知其由故不時至旣見又故觸之守益怒鄭走出使人再召萬萬曰府公之疾已矣使還疾果愈蓋喜極當濟之以怒也鄭爲人長者貧者則煮藥飲之以爲常子懷魁有傳爵魁舉人官州守

張見泉天寶人館于靖之深渡墟有丐者來投宿謂張曰
觀君骨相當以術顯不如學醫可以濟世救人張曰何
從得師丐曰遠在千里近在目前張曰子丐而癩者也
自病不能醫豈能教人乎丐取飯餽搔之通體光潤張
知其異人留而受學居月餘遂盡其術丐告以明日將
別去張不能留率其徒攜樽祖餞遂至溪邊丐者脫衣
下河止見一大龜隨水而去張遂有名于世稱爲神醫
曾圭玉海澄人當海氛賊虜索餉知其精於岐黃乃禮重
焉生平遇奇險症衆莫能醫者治輒神效晚歲客漳一
日自診脉警曰大數盡矣時一子在側急携歸中途風

潮不能到家有女適太江遂倉皇栖泊入門告主人曰
吾爲此來以身後事相苦也衆笑之曰夕飲食談論自
若將就寢沐浴更衣徧辭主人曰天假之緣幸未今夕
明日不復相見矣侵曉食粥端坐而逝子仲芳習父業
能於數年前斷人生死所用藥常起死回生漳人多重
之又生平重義輕財樂交名下士一時如鄭白麓張授
夫皆稱莫逆單寒求之無不應年七十餘無病終子砥
卿傳祖父業診脉用藥有家法尤精太素脉富貴壽天
言之多中蓋醫傳三世於此道亦三折肱云

張德春字敬之中歲遊庠精祿命書談多奇中宮保壯毅

許公素相善雍正壬子冬於朋儕坐處聞許公病欲延醫
 醫恹然流涕坐客問故曰許公星命難涉冬月今聞欲延醫
 恐不能起矣後竟如其言生平兼通醫理測星命能知人病
 症秋闈省試朋儕有病皆為之急其篤於友義如此

陳誥先詔安人元震裔孫家貧嗜學善演六壬康熙間隱于城隅賣卜有漁者問其何方撒網先告以某日寅時何東北方五里外吉是處正山阿險僻之區非撒網之所也姑如其言往試之果得皮箱二隻裝銀四百兩又嘗適村庄聞鼓樂聲詢知建祠者方纔架脊嘆曰今日不吉建必無成後果驗其吉凶立應如此時人為之語

曰欲知禍福到走向問陳誥

右方技

前志不載壽民僅傳明世旌壽坊平和會敦立百歲詔安沈仲選百有二歲耳

國朝前除年樂利之休閒間得靜養其天和古云太平之世民多壽故視前代為盛其蒙

皇恩建坊者龍溪林二湯誇並百有二歲林敬侯雄並百有三歲漳浦陳允百有一歲南靖翁正柯立詔安鍾士心高海澄高澄甘賢並百歲其

恩賜壽官者平和張仕琦百歲其未蒙

旌典者南靖吳元和葉君當並百歲平和楊景增百有二歲

至詔安沈起龍年百歲妻楊氏年九十餘六子四十五

孫五代一堂諸福備至乾隆二十四年蒙

御賜詩章匾額緞疋以旌其閭尤為千古異數若詔安黃宸

輔者現年百有三歲龐眉黃髮康強無恙更見

昇平人瑞壽婦已

旌者龍溪趙伸妻郭氏陳道利妻林氏並百有二歲生員

楊道泰祖母連氏百有一歲顏時埤妻蔡氏百歲漳浦

林梅元妻魏氏百有四歲長泰姚士躍妻張氏百有六

歲平和謝謂美妻曾氏百歲若龍溪莊應魁妻陳氏雖

未蒙

恩典享年百有二歲尤見貞壽詩云

右壽民壽婦

漳浦地多仙晉亭峰吳公坪火梁神仙宅大武石棋盤窰

山鍊丹所皆仙跡也

隨潛翁開皇時人鍊形石壁山養白蝦蟆以自隨後不知

所終

唐康仙不知何許人乾符間賣藥長安遇中丞萬碣自稱

圓山琵琶坂康長史及黃後過漳聞圓山琵琶坂乃無

有康長史昔入祠中見像如長安中所見者因欲移其祠于山上夜夢康曰賣藥因循未得還却因耽酒到人間一心只戀琵琶坂無意更登山上山

宋吳本海澄青礁人母夢吞白龜而孕學道雲遊得三五飛步之術以濟人為念歿而靈焉鄉人祠祀之祠旁嘗有泉湧以洗病無不愈者乾道中封慈濟真人

劉希岳龍溪人端拱中得道居西都老子觀嘗言辛勤未逾十年人驚不老歲月俄經一紀自覺如新一日陳席而臥須臾見金蟬飛出遂失所在號曰朗然子

邱元迪龍溪人本州天慶觀道士也遍遊名山祥符間于

龍虎山得道能驅虎神賜號冲天大師

陳真佛白土社人少飯牛牛慈息伴狂不事產業辟穀焉石山不知所終或曰尸解去耳

郭公者居表政里嘗遊九侯山異人授以遁形之術每御冠輶出奇立功沒而神異鄉人祀之銅鉢城

三公者不知其姓氏巖人也兄弟三人得導引修鍊之方又善八門法嘗將鄉人禦賊草木皆兵後人名其山曰將山老年結茅于節惠里人覓之輒黃霧四塞不可近云

楊虔誠龍溪人年十四棄俗入道能為詩文自稱白衣道

人于天寶山夜坐見東北方其天燈雲旗之異遂自古
谿吳峯至天柱山止焉有蛇爲繞地因卓錫其上鍊氣
闕形後不知所之

陳泥丸名楠得太乙刀圭法捻土爲藥投疾輒愈人爲之
泥丸先生故爲博羅人嘉定間在漳州赴鶴會與會主
語曰我當會裏尸解因留偈四句命其徒白玉蟾題之
日頂上雷聲霹靂混沌落地無蹤今朝得路便行騎箇
無角火龍遂于梁山下入水而逝當日有葛縣尉在潭
州寧鄉見之泥丸寄書與尉使歸潮達其父卽解去日
也有口授全直集行世

白玉蟾瓊山道人師事陳泥丸隨入漳侍于梁山下泥丸
口語皆成文章但未嘗親書所留偈皆蟾題之一日與
籬桶老子犄角入水而逝其老子先有一斧在地再尋
其斧亦不見蟾歎曰水解也乃獨去縱遊于羅浮後莫
知所之

明董伯華不知何許人成化時往來漳泉間能呼風雨立
至又常賣雷符一符一錢然必童子乃賣之藏符于掌
傍耳聞之應聲而震人稱爲雷師後不知何往

陳仙者漳浦盤陀人貧而好客遊三其人授以天門地理之
書及一黑丹曰是能點鐵成金但濟貧足耳無濫用陳

清江府志 卷之五十一
取書讀之天文不甚解解召雷耳通地理丹亦試之果
驗久之告其友異人復來怒取丹去乃復貧又以召雷
故見責于太守乃潛身山野作地理師後爲西山李氏
建祠堂旣告成以後驗遂徑去不知所之後竟如其言
張徹平和人字道隱世居瑄溪得龍江良背之學終身不
娶好學深思所引說經義不依訓詁自見大意善臨池
非其人丐一字不書嘗夜坐虎跳垣蹲踞庭中頃之趣
使避去侍者問曰何兀然不動也答曰虎噬人出人不
覺覺在先則彼不得舒其怒矣其立說平實不炫人以
巧多如此

卓晚春字上洋不知何許人高可四尺蓬頭跣脚嫻書畫
與平和張徹善讀書于芝山僧舍僧以其醜多侮之一
日郡憲欲到寺上洋乃臥佛殿中忽然而斃虫多如蟻
臭穢難堪僧慌走而白張張至呼曰郡憲將至何當若
此起而大笑時端午人競龍舟上洋見之歌曰樂分樂
兮樂極哀生人以爲狂俄而舟覆

右仙

唐懷暉隱良山宣宗詔住京兆章敬寺上堂語曰自性如
是光明曩劫至今固無變易猶如日輪遠近斯照雖及
衆色不與一切和合若能近照無第二人舉錯施爲不

虧實相元和十三年示滅諡大覺禪師

義中者三坪開山和尚也故爲高陵人稚年出家造懷暉後謁百丈仍往撫州見石鞏一見開弓云看箭義中當前擘胸鞏收箭云三十年來張一弓掛二箭而今只射的半個聖人後南遊見大顛顛云卸却甲冑來義中退步而立由是妙悟空中深了無碍寶歷初于漳開元寺後卓菴會昌間汰僧遂入三平山有九層巖者山鬼所居義中卓錫衆鬼昇投之深潭及還坐如故復以籠舁至瑞龍百丈深沈之復如故由是驚伏乞爲架院曰願慈悲閉目七日許之五日日忽開院成山門未就鬼化

形逸去有大魅身毛魑魍義中戲擒住隨侍指使曰毛侍者乃集衆居焉賜號廣濟禪師咸通十三年十一月集門人曰吾生如泡泡還如水三十二相皆是假爲汝等有不假爲底法身與大虛等無生滅去來之相未嘗示爾臨行未免老婆閉目長嘘而化

羅漢和尚漳浦人叅闕南常禪師問如何是大道之原南打漢一拳遂有省作歌而去中有云駭散疑團獨胆落與頭看見日初圓

唐竊然生寶歷間本州和平里人幼不如董年十三師事懷暉禪師鐵鉢自給臥不解屨長入淨慧院一食三衣

徑行論學獨步貞元間病四部經舊解淵渺觀教沙華
楞嚴辨若建瓴嘗登壇演說有紅蓮變白異香飄穿之
瑞重作戒壇七級廣輪高深尺度皆準以律法雲游四
方每取水赫曦中飲道賜者所過林莽虎皆馴伏祈雨
祈晴無不立驗將示寂囑其徒必香烟絕處葬我及化
羣訝其龕輕至香盡其龕仍重停宿忽雷雨晦冥沒入
石中

楚熙不知何許人卓錫岐山刻竹引泉枯竹皆成笋因名
所居巖曰瑞竹

無隱師者住石獅山嘗聚徒講經有老虎跪而聽法因時
或騎之以入市買肉飼之一日偶不下山虎饑甚師乃
伸一臂餵之後示寂山中今有虎確遺跡

文炬字妙應興教寺開山僧本莆人初從譚空禪師落髮
于莆時西院僧數百人皆染疾師以竹杖次第點之立
起聞王異之賜號慧日禪師贈以詩云山有重囊勢門
開兩徑斜溪聲寒走澗海色白流沙菴外曾留虎堂中
蒼雨花不知遺識地一一落誰家蓋師于地理最精嘗
作遺識後無不驗著有博山經行世

桂琛字沙法嗣也初漳州牧王公建地藏院延琛開法大
闡乎要其徒大法眼禪師欲出嶺謁琛琛語之曰若論

佛法一切現成眼大悟因隨琛歷覽叢林後爲法眼宗
清豁居保福寺參睡龍龍曰豁闍黎燒香說悟處答曰香
已拈了悟卽不悟龍說而許之將入苧溪待滅遺偈於
橋曰世人休說路行難鳥路羊腸咫尺間珍重苧溪溪
上水汝歸東海我歸山於湖頭石上端坐而逝

宋懷璉龍溪陳氏子師事泐潭皇祐中召對化成殿問法
稱旨賜號大覺禪師所賜答詩頌凡十七篇至和中上
疏乞歸英宗詔許之賜龍鉢孟璉曰法以瓦鉢食食此
鉢非法對使焚之旣渡江西四明郡守虛席迎致爲建
閣藏所賜詩頌榜曰蘇軾爲作碑文欲見其所賜詔書

藏不出

本權性質直勇於道師事晦堂初黃山谷問晦堂曰此中
誰可與語晦堂曰漳州本權耳權方督役開田山谷同
晦堂往門曰直歲還知露在生兒麼權曰是男是女黃
擬議權卽揮之上堂舉寒山偈曰吾心似秋月碧潭清
皎潔無物堪比倫教我如何說老僧則不然吾心似燈
籠點火內外紅有物堪比倫來朝日出東

白衣僧從謙住開元寺嘗遊石壁山于亭際見二士對奕
就之化鶴而去遺一棋子取吞之辟穀不食四十年歲
百餘仍歸岐山示寂

祖華作菴於葵岡嶺下嶺故多象每出沒爲鄉里患自祖
華居此而象遂絕潮守黃定書其扁曰無象菴

明本源開元寺僧國初道譽流聞永樂十五年降勅徵之
後入京不知所之初居南靖之龍嶺結茅名青龍菴今
有卓錫泉在焉

知海龍溪人初名圓姓自號閒寂和尚嘉靖間習靜曹巖
山中夜坐常見白光蓮花不作聖解遂舍去遍訪禪林
研心經藏得聲聞之學十餘年乃歸住錫南山寺大演
宗風緇徒數百人常提萬法歸一人何歸以示叅學未
有能契入者所題咏咸有理趣士大夫多敬禮之

海湛字涵清有夙慧爲人傭作十四坡緇結庵梁山下明
末邑人蔡而烜爲賊所逐倉皇入庵中時湛方入定而
烜負背立賊不能見一日扶杖下山別檀那歸而坐化
樵雲故開元寺苦行僧也萬歷初萬松關未爲孔道然行
人以捷徑多出此樵雲結小菴日施茗山中夜卽誦書
數年諸經通曉神宗欲索天下名僧從苦行得法者有
司以樵雲應旋賜紫衣旣歸乃于岐山依石結室終焉
斗頭巖僧失其名相傳與西潭吳尾公善示寂時尾公以
事往三山僧囑其徒以履遺之尾公回途中遇僧問何
往荅云將雲遊恐未歸有履在其處相贈又囑云貴鄉

水與路皆宜改不然必有戈兵之慘到家方知僧已逝矣未幾倭至男女死者九十餘人

國初海寇躡焉至今鄉人猶思僧言

國朝照乘爲汶石禪師法嗣居武夷山白玉瞻故址後住浦城馬峯寺自知死期先一日作偈別友云白雲無盡山友甚親風清月皎處處分身明日衆請題畫像起立而逝

宜信南山寺僧憫寺宇頽墜于本山開堂聽法者千餘人見諸僧衆分門立戶彼此交訂因一僧問如何是宗門大旨曰去住原非我捧唱不是他一個雲門餅好送趙

州茶

廣傳字心在漳浦陳氏子居雲霄南山寺每值齋糧匱乏輒跪告章馱隨有負擔來者初不識字後通內典學吟詩順治己亥春自知當死集諸徒衆沐浴更衣登龕跏坐曰吾候道友澤雲來也今到山門矣俄澤雲至卽口占一偈云我欲臨行自出山西歸無礙妙其閒靜時寫意從心靜妙解如來證法班語畢而逝異香滿室

國朝僧如定海澄八都陳氏子得法於黃蘗居漳浦之金仙巖耳聾簡於酬對專心內證不事論說

僧淨方海澄三都林氏子得法能詩武林還往郡北大山

寺三度開堂紳士雲集

僧性敏海澄三都蔡氏子居郡北龍山種梅數百株與淨方相去十里結韻社紳士陳常夏謝亦驥陳箴劉勃李基益王之鄰黃正樾林惇逸民楊祺魏岸洪思施礎凡數十人相唱和亦禪宗之秀也

僧無垢居太武山不事課誦惟力脩苦行斬絕塵根而已山半有田乏牛耕無垢以肩荷犁能終畝暇則折薪下山走數十里買米以歸終年蔬食水飲雖絕粒不爲意所居與虎爲隣蓬戶桑樞而卒無患故老相識流傳謂其壽百歲有奇在當時問其年紀不自知詢其姓氏亦

不能詳云


釋永慧修白業於清泉寺賦性恬淡律行森嚴二十餘年不出山淹通文史善詩歌喜與名人相倡和鄉前輩劉幼安戴麥村諸公訪方外交爲蓮社之遊蓋亦近世高僧有遠公齊已參寥遺風焉著語錄詩集若干卷蔡文勤公稱其詩爲可傳其徒衍謙亦能詩

右釋

濱州府志

卷之五

二十九



41463

